

LIBER PRIMUS

AD FERDINANDUM MEDICEM CARDINALEM COSMI MAGNI DUCIS HETRURIAE F.

C1_1 v.1 Haec, mihi quae faciles dictarunt carmina Musae,
 2 dum florens aetas lusibus apta foret,
 3 Ferdinande tuis quamvis indigna putarim
 4 auribus atque ullus queis habeatur honos,
 5 qualiacumque tamen statui tibi mittere, ut unum
 6 te victura diu, te moritura colant.
 7 Nam cui me fortuna prius, mox grata voluntas
 8 addixit multis demeruitque bonis,
 9 huic nostrae par est horae famulentur et haud me
 10 immemorem tanti testificentur heri.
 11 Quem jam nec tristes casus, neque prospera rerum
 12 eventa e nostro corde fugare queant.
 13 Quod, nisi Pierides et vatum numen Apollo
 14 abnuerint numeris rursus adesse meis,
 15 ipse olim vitae quibus illustraveris actis
 16 praesentem aetatem fama loquetur anus.

AD COSMUM MEDICEM MAGNUM DUCEM HETRURIAE

C1_2 v.1 Quantum picturae statuisque poemata praestent,
 2 o Dux magnorum maxime Cosme Ducum,
 3 inde patet : quod quae Cous jam pinxit Apelles,
 4 quaeque adeo excudit marmora et aera Myron,
 5 praeterquam brevibus quod tum conclusa fuerunt
 6 finibus et populo vix bene nota suo,
 7 cuncta etiam externis cecidere eversa sub armis,
 8 ac nunc perpetua condita nocte latent.
 9 Sed quae Virgilius, quae quondam scripsit Homerus,
 10 quaeve alii Aoniis turba sacrata choris,
 11 praeterquam totum quod se effudere per orbem
 12 fecere et numeris omnia plena suis :
 13 nunc quoque post tantum tempus, post saecula mille,
 14 postque tot Italiae bella cruenta, vigent.
 15 Cumque iis Aeneas Tros et Pellaeus Achilles
 16 Sisypheusque Ithacus docta per ora volant.

17 Nec minus Augusti nomen divina celebrat
18 fama atque insigni cum pietate colit :
19 tu quoque, mirandis cujus virtutibus astra
20 (ne meritas laudes deterat ulla dies)
21 jam vatem peperere : fave Dux optime vati,
22 cujus carminibus jam redivivus honos
23 heroum surgat, proprio qui sanguine quondam
24 solverunt patrios obsidione lares,
25 innumerasque animas leto fudere per agros,
26 quos rigat et Minio Tuscus et Arnus aquis.
27 Ulturus Cimbros tunc cum Radagasus avosque
28 duxerat e Scythia millia multa virum.
29 Jamque adeo foedis Italas affecerat urbes
30 cladibus atque ipsi moenia multa solo
31 aequarat Divumque everterat aurea templa,
32 inque dies caedes accumulare novas
33 ibat : nec pueris senibusque trementibus aevo,
34 nec nuribus parcens virginibusque piis.
35 Quam tu tum faciem rerum (Dux magne) fuisse,
36 Italiam gemitus quosve dedisse putas ?
37 Italiam regum sedem heroumque parentem
38 assuetamque orbis totius esse caput.
39 Ille, velut caelo demissum fulmen ab alto,
40 quod cinctum nimbis turbinibusque ruit,
41 et veteres imis radicibus eruit ornos
42 involvitque atris ignibus omne nemus :
43 quaqua ibat fusurus opes viresque Quiritum,
44 consuemat ferro late aperire viam.
45 Omnia lugebant subita prostrata ruina :
46 inque animis hominum nil nisi terror erat.
47 Ipsaque, quae summis in montibus oppida sese
48 munierant armis praesidioque loci,
49 adventanti hosti subito reclusa patebant,
50 ne luerent parvae supplicium inde morae.
51 Tu sola haud amplis etiam tum moenibus aucta
52 amnis et haud medio dissociata vado,
53 barbariem portis excludere es ausa furentem,
54 primaque Teutonicas spernere Flora minas.
55 Illa vias aditusque omnes insederat, illa
56 implerat quantum vallis utrimque patet.
57 Nec collis, despectat agros unde alta virentes
58 Faesula, non multo milite tectus erat.
59 Omnia complerant acies juga montium et omnia
60 aere renidebant, esset ubi orta dies.
61 Tympanaque horribilesque tubae strepitus frementum
62 excibant fortes ad fera bella duces.
63 Inter quos gestans primos Radagasus honores
64 Cimbrorum ex alto sanguine natus, ait :
65 "Ergone tot menses urbem oppugnabimus unam ?
66 Nec dabitur manibus diripienda meis ?
67 Et, cui non ausa est lectas opponere vires
68 intranti Italiam Roma superba suas,
69 se longas fecisse moras Florentia dicet ?
70 Imprimet et tantum dedecus ista Getis ?
71 Ite igitur socii, certatim invadite muros,
72 vosque illuc per vim desiluisse juvet.
73 Vivida non amat ex aequo concurrere virtus,

74 nec tales animos Vistula et Ister alunt."
75 Sic dicens pariter se suscitatur acer in armis
76 cunctamque ad muros cogit adire manum.
77 Illa volat : circumque omnes cinxere corona,
78 seque alius (...) alium calce terente premunt.
79 Missilia extemplo jaciuntur tela facesque,
80 et glans in morem grandinis acta ruit.
81 Saxa pluunt lapidesque graves, queis icta fatiscunt
82 moenia, queis domuum tecta trabesque labant.
83 Completur jaculis caelum levibusque sagittis,
84 et multo scalas milite turba gravat.
85 Quarum aliae substant stabiles et summa capessunt,
86 fractae aliae rursus dejiciuntur humi.
87 Dumque adeo coeunt una virtusque pudorque,
88 et saevas properant quisque subire vices :
89 hi se ut defendant, illi potiantur ut urbe,
90 ingentes fossas corpora caesa replent.
91 Atque ipsi in muris vix jam consistere cives,
92 vix jam praesidio turribus esse queunt.
93 Accurrunt matresque simul teneraeque puellae,
94 atque ope pugnant, qua pote quaeque, juvant.
95 Haec liquida festina pices, haec tela facesque,
96 haec multo calidas igne ministrat aquas.
97 Est et quae vino vires revocatque fovetque,
98 et tempestivos suggerit usque cibos.
99 Ipse tamen semper magis ac magis integer hostis
100 ingruit et jam jam moenia victor habet.
101 Tum vero acceptus caelo et gratissimus unus
102 Aeternoque hominum caelicolumque patri,
103 Zenobius, qui post heroibus additus astra
104 accolit, et precibus rite vocatus adest :
105 suspiciens stellas supplex et ad aethera tendens
106 brachia, sollicito fudit ab ore preces.
107 "O, qui saepe alias, Divum Rex magne, tulistis
108 afflictis rebus commiseratus opem,
109 si te cura subit nostrae nunc ulla salutis,
110 ararum tua si pectora tangit honos :
111 aspice quam magnis hostis tuus irruat ausis,
112 quam ferus in populum saeviat ille pius.
113 Nec prosunt turrets, nec propugnacula nobis,
114 nec pinnae auxilium, nec tabulata ferunt.
115 Ipsaque deficiunt animi fortissima corda :
116 et nostro tellus sanguine tincta madet.
117 Aspice summe pater : nec, si qua admisimus, usquam
118 avertant oculos impia facta tuos.
119 Et simul immanes depelle a manibus hostes,
120 depelle a templis tela avidasque faces.
121 Haec mecum pueri insontes castaeque puellae,
122 et timidae matres invalidique senes,
123 haec eadem, sacrum quarum caput infula cingit,
124 orant et lacrimis ora sinusque rigant.
125 Annua sic haec lux reparatae festa salutis
126 Aeternum ante aras luceat alma tibi.
127 Testeturque isto surgens de nomine templum,
128 templum ingens, multa et religione sacrum,
129 te jam captam urbem certae eripuisse ruinae
130 civibus et muros restituisset suos."

131 Haec ille. Et refici vires in proelia pubes
132 sensit et est membris additus inde vigor.
133 Ergo alacris juvenum manus emicat et petit ultro
134 arma pharetratis obvia ferre Getis.
135 Spondet et egregia virtute innixa futurum,
136 ipsa ut barbaricum fundat agatque globum,
137 si subito hinc atque hinc portis egressa reclusis
138 hostis in aversi terga repente ruat.
139 Id verum patrum vix concedente senatu
140 impetrat, atqui erat iis haec reliqua una salus.
141 Protinus illa igitur portis erumpit apertis,
142 et multum madidam sanguine tingit humum.
143 Territus a muris confestim avertitur hostis :
144 nec dux ipse potest jam cohibere fugam.
145 "State viri : mihi capta luet Florentia poenas
146 et jam jam labem templa domusque dabunt.
147 Efficite exemplo reliquis sit ut urbibus una haec,
148 et tutum vobis hinc patefiat iter.
149 Hic vos, hic, inquam, victricia signa Getarum
150 in Capitolini sistitis arce Jovis.
151 Sic socios Radagase tuos hortaris. At illos
152 urget anhelantes versaue terga ferit
153 Tusca phalanx, cujus princeps insignibus armis
154 agmen agens Medix ibat et altus equo.
155 Imperii Medix ductum cognomen ab Oscis,
156 cognomen, quod non deleat ulla dies ;
157 ibat, et in turmas animis tendebat avitis ;
158 inque ore inque oculis ignis et ardor erat.
159 Fulgebant longe in media mala aurea parma,
160 quae quondam Hesperidum mala fuisse ferunt,
161 tempore quo Mauros inter fortissimus omnes
162 imperium Libycus forte regebat Atlas.
163 Illa sua assidue servabat in arbore torvus
164 atque ardens oculis tergoribusque draco.
165 Non noctu, non luce umquam fera lumina somno
166 claudere, non alio flectere suetus iter,
167 sed ramis haerere vigil custosque tueri
168 aurum : atque hospitibus maximus esse metus.
169 Horrendum trifidis lambebat sibila linguis
170 ora, etiam si quem viderat ire procul.
171 At bonus Alcides nec longa volumina caudae,
172 nec timuit multis terga cruenta notis.
173 Sed clava aggressus vigilantem ac torva tuentem
174 perculit, haud dubio marte deditque neci.
175 Malaque decerpens Tyrrhenum avexit ad Arnum,
176 Faesula cum a tanto est aedificata duce ;
177 Faesula, cui nullo moriturum nomen in aevo
178 indidit Atlantis filia pulchra senis.
179 Quam nempe et captam cum jam victoris amore
180 discessuram a se cerneret altus Atlas :
181 "I, felix mea nata (inquit) comes Herculis et te
182 in Tuscis tanto sub duce siste jugis.
183 Malaque, quae nostris conjux tuus abstulit hortis,
184 seque relaturum forsitan esse putat
185 Argolicum ad regem, soli tibi nata relinquet ;
186 et dicet : - Magni haec pignora amoris habe,
187 quae mox et nati et natorum a stirpe nepotes

188 servent, et gentis sint decora alta meae -."
 189 Haec ille. Et Tuscos cum primum venit ad agros,
 190 uxori Alcides aurea mala dedit.
 191 Ac mox discedens : "Ferat haec, mea Faesula (dixit),
 192 quicumque e nostro sanguine natus erit."
 193 Illa igitur scuto Medicem impressa gerentem
 194 ut procul aspexit dux Radagasus, ait :
 195 "Hic, inquam, hic Scythicos qui nunc fulgente maniplos
 196 aere fugat, nostro caesus ab ense cadat.
 197 Et, quae nunc auro fert illita mala micante,
 198 jam nunc de domini tincta cruore ferat."
 199 Sic fatus juvenem aggreditur. Petit ille petentem,
 200 armaque et audaces miscet uterque manus.
 201 Cumque adeo multis confossi pectora plagis
 202 sanguine sparsissent arma suosque sinus,
 203 concidit in medio certamine barbarus hostis,
 204 et viridem moriens ore momordit humum.
 205 At Medix exemplum urbi gentique domoque
 206 ipse suae et specimen grande futurus abit.
 207 Quaeque auri multo splendebant mala colore,
 208 rettulit ad cives sanguinolenta suos.
 209 Ac nunc ut facti semper monimenta supersint,
 210 scutum auro fulget, sanguine mala rubent.
 211 Quae quantum nostro splendescere carmine possint,
 212 o Dux magnorum maxime Cosme Ducum,
 213 quantum antiqua queat Medicum domus, inclyta quantum
 214 innumeris virtus se tua tollere avis,
 215 conatus ni dura meos fregisset egestas,
 216 jam foret in toto notius orbe nihil.
 217 Et tamen hac in re cunctas impendimus horas,
 218 quas licet, et carmen pangimus omne tibi.
 219 Forsan et hoc inter tua tot decora inclyta parvum
 220 non erit in longa posteritate decus.

AD MARCUM TULLIUM BEROIUM

C1_3 v.1 Quod tibi nondum etiam grates persolvimus ullas,
 2 ullaque nec nostri munera detulimus
 3 ingenii, tanto quae par fuit intervallo
 4 mittere, non parvi feneratoris aucta mora,
 5 nolim id me fecisse putes, quod fastus inani
 6 vento inflat multumque ipse mihi tribuam,
 7 aut quoniam omnino vita jam deside fractus
 8 ipse mei nusquam sim memor officii :
 9 officii, cujus capient oblivia me tum
 10 denique, cum in noctem lumina perpetuam
 11 occludam, neque jam quicquam caelestibus ullis
 12 debentem ipsa suo terra teget gremio.
 13 Sed quia tantarum memet praeconia laudum
 14 et numeris abs te carminibusque tuis
 15 mandata et magnum in primis testantia amorem,
 16 quem meus in te mi conciliavit amor
 17 perpetuus, suspensum animum tenuere, tuo qua
 18 merces ingenti munere digna foret,
 19 quam me pro innumeris meritis proque indole tanti
 20 ingenii expensam ferre tibi esset opus.

21 Nec te incusare et tacite reprehendere posses,
 22 quod, quae vix magnis vatibus attribuas,
 23 sic mi impertieris, ut quamquam conscia mens est
 24 ipsa sibi, talem me tamen esse rear,
 25 Beroi, qualem tua pagina praedicat et me
 26 decipere hac animum credulitate juvet.
 27 Sed certe (quid enim dubitem tibi dicere verum ?
 28 Aut quid, quod notum est omnibus, inficier ?)
 29 Me mea Castaliae cultissima numina quondam
 30 squalentem ignavo deseruere situ
 31 et longum dixere vale ; quia rarior artes
 32 illarum, meus ut mos erat ante, colo :
 33 frigidaque obrepens membrisque animoque senecta
 34 inculti vires atterit ingenii ;
 35 quodque poetarum commercia grata frequentem
 36 interdum atque ipsi me mihi surripiam,
 37 inque nemus silvamque abdam, quae plurima Phoebō
 38 floret et aeternis perstrepit alitibus,
 39 increpat, et rudibus vix hos inscribere chartis,
 40 quos tibi nunc meditor, versiculos patitur.
 41 Huc etiam accedit, quod postquam Etruria bello est
 42 vexata atque atris litibus implicuit
 43 Roma orbem armorumque innexuit improba causas,
 44 et pax exul abit finibus Ausoniis,
 45 nullus honos Musis, ratio non ulla laborum
 46 est habita et nulli praemia proposita
 47 doctrinae et studiis merces ablata bonarum
 48 artium et earumdem semper amica parens
 49 concidit, heu, regum larga et prolixa voluntas,
 50 nilque adeo, quo se jam tueantur, habent.
 51 Non secus ac Scythiae cum barbarus incola terrae
 52 everso Latii funditus imperio
 53 obtinuit regnum in media (proh dedecus) urbe,
 54 pressit et Italiae libera colla iugo,
 55 expulsisque bonis procul undique disciplinis,
 56 invasit foedans omnia barbaries.
 57 Quare, etsi forsā non infeliciter artes
 58 tractarem quondam maxime Phoebe tuas
 59 carminaque assidue canerem, nunc fractus et exspes
 60 hujus curam omnem deposui studii.
 61 Quo tamen ut residemque animum ingeniumque labori
 62 desuetum multo tempore post revocem,
 63 saepe precor Musas supplex, dent se mihi quales
 64 tum dederant, cum aetas florida ver ageret
 65 atque incredibili laudum flagraret amore
 66 speque bona in primis credula sese aleret.
 67 Quod certe ipse quidem valde cupioque voloque,
 68 si quid valde alias, aut volui, aut cupii,
 69 non satis ut tantum faciam tibi, cui satis uni
 70 in primis factum magnopere esse volo,
 71 verum ut, quae in manibus multos male providus annos
 72 informata habeo, protinus absolvam
 73 perpoliamque acri tandem simul omnia lima et
 74 nil imperfectum, nil rude sit reliquum.
 75 Atque hoc si mihi contingat votumque secudent
 76 hoc mihi si vatū numina Pierides,
 77 pendebit mea tum sublimi e fornice templi

78 fistula et haud uno tibia nota sono.
 79 Tuque adeo meritas possis ibi dicere laudes
 80 et de me carmen condere veridicum,
 81 postera quod quondam secum mirabitur aetas
 82 ullaque non umquam secla perire sinent.
 83 Nunc itaque ingentem vestigia pone Maronem
 84 certa preme et nullum suspice praeterea.
 85 Illum unum admirare, unum cole, et, ut facis, unum
 86 esse putes, reliquis quem omnibus anteferas.
 87 Atque ita, quas laudes large mihi contribuisti,
 88 convenient in te tum magis atque magis.
 89 Iisque adeo, quae tum facies, assurget Homerus
 90 carminibus, dum acres cogit in arma duces,
 91 congressumque tuum non dedignabitur Orpheus,
 92 Orpheus Oeagri filius Ismarii.
 93 Qui cum nec Stygia Eurydicem revocare palude
 94 nec cantu infernas flectere posset heras,
 95 toto animo, toto suspirans pectore fertur
 96 dulcius haud umquam concinuisse lyra.
 97 Bistoniae sedenim, nimium turba improba, matres,
 98 infensae numeris flebilibusque modis,
 99 absciderunt vati caput a cervicibus atque
 100 conjunctum citharae, ut fluctibus aequoreis
 101 erraret misere duro transfixum adamante
 102 moxque ita caeruleis obrueretur aquis,
 103 in mare jecerunt. Verum per marmora vectum
 104 ad Methymnaeos applicuit scopulos
 105 Calliope mater, quos inter candida cursus
 106 vox capitis, vox est ingeminata lyrae
 107 saepius et dulci sonuerunt litora cantu
 108 et positae medio insulae in Ionio.
 109 Accurrere viri, maestae accurrere puellae,
 110 et sacrum tumulo composuere caput.
 111 Atque una junxere lyram, quae garrula montes
 112 traxerat atque undas lenierat Stygias.
 113 Illo igitur Lesbi, qui post sunt tempore nati,
 114 et cantu et citharae mentem animumque sono
 115 magnopere oblectare solent, praeque omnibus uni
 116 et canere et dulci dulce sonare lyra.
 117 At Thracum, postquam illa datum est resciscere facta,
 118 ingens invasit pectora maestitia.
 119 Signa ergo impressere suis uxoribus omnes
 120 tum primum et tanti ut nunc quoque sint memores
 121 flagitii poenasque luant ita manibus Orphei :
 122 foeda notant foedis omnibus ora notis.

AD IOSEPHUM BOCCAM

Cl_4 v.1 Dum te Bocca tenet Rigulanum et vitreus Aesar
 2 piscantem in medio flumine saepe videt ;
 3 dum clivus, qui culta tuae prope limina villae est
 4 undique proceris obsitus arboribus,
 5 errantum spectat vestigia pressa ferarum,
 6 mane sequi multa per nemora alta cane ;
 7 dumque sub umbrosa platano, qua lene susurrans
 8 prosilit e scabro murice rivus aquae,

9 sive alta e specula modulantem carmina Faunus
 10 servat et in viridi cortice verba notat :
 11 quae mox ingratas referens iterata sub auras,
 12 silvicolas flammis urat Hamadryades ;
 13 sive plagas avibus tendentem, ubi vallis opaca est,
 14 luscinia assiduis questibus increpitat.
 15 Queis Lyda Ornithium quondam donavit Arachne,
 16 usumque occultos edocuitque dolos,
 17 Ornithium, quem vel misere dilexit et unum
 18 optavit certo jungere connubio
 19 ipsa sibi ; verum Ornithius per rura vepresque,
 20 incautas visco fallere doctus aves,
 21 ac baculo impositam summo ostentare procacem
 22 Nyctimenem et varios edere vocis sonos,
 23 spreverat occultos glacie frigentior ignes
 24 virginis, oblatos respueratque toros :
 25 implorantis opem donec miserata puellae
 26 audiit e caelo vota precesque Venus.
 27 Ergo illum assidue praedas in tecta ferentem
 28 captantemque omnes, quas modo vellet, aves,
 29 aucupio coepit maerentem eludere inani,
 30 jussit et in vacuas saepe redire casas.
 31 Tum nata ante alias telam componere Arachne
 32 et nulli inferior retia texere acu :
 33 "Quid te (inquit) toties, puer o pulcherrime, quid te
 34 aucupium frustra juvit inane sequi ?
 35 Si merces haec ipsa tuos male grata labores
 36 infelixque artes exitus iste manet.
 37 Ipsa ego, quam multi lecto petiere jugali,
 38 cujus et a magno Lydia amore perit,
 39 quamque levi teretes versantem pollice fusos,
 40 texentem et molli stamina picta manu,
 41 aemula (quis credat ?) praesens mirata Minerva est
 42 victaque, si verum confiteatur, abit ;
 43 ut mihi te, cujus vehemens amor urit amantem,
 44 hoc uno saltem munere demerear,
 45 retia confeci gracili tenuissima filo,
 46 Nere quod e Serum vellere nupta solet.
 47 Ipse plagas nodosque aptos miraberis, in quos
 48 illapsae pennis impediuntur aves ;
 49 ipse agiles limbos orbisque ex osse sequaces,
 50 porrectum et multa in brachia nobile opus,
 51 ipse amiti suspensum alta spectabis utrimque
 52 pandere et ingenti colligere arte sinus.
 53 Namque in quincuncem lino distincta tenaci
 54 texta patent laxis parte ab utraque plagis,
 55 inque hos praelonga sinuantur harundine nexus
 56 hinc atque hinc, cum jam stant posita in mediis
 57 arboribus miseris passim exceptura volantes
 58 retia, quae pullo tincta colore latent.
 59 Atque his si qua umquam captam sese explicet ales,
 60 si qua ex occultis avolet insidiis,
 61 illa eadem accipitres inter traducere vitam
 62 tuta queat cunctos effugiatque dolos,
 63 possit et in visco pennas haerere sequaci
 64 libera et e pedica sumere laeta cibum.
 65 Haec cape dona puer, tibi quae tibi dedita soli

66 ursit acu et digitis Idmone nata suis.
 67 Haec cape, quae, nisi me vates praesaga futuri
 68 temporis et rerum provida fallit anus,
 69 retia de nostro quondam cognomine dicta
 70 ingenium doctae testificentur herae ;
 71 et penes externos, quodcumque hoc nomen, Etruscos
 72 inventum numquam tale perire sinant.
 73 Sed potius, Lydis ceu gens erit orta colonis,
 74 sic Lydae usurpet virginis illa dolos.
 75 Inque alia nusquam regione frequentior usus
 76 istius vigeat nobilis aucupii."
 77 Haec anus Idmoniae cecinit ventura puellae,
 78 haec eadem Ornithio Lyda puella suo.
 79 Quae mox conjugio pueri taedisque potita,
 80 ostendit tenues explicuitque plagas.
 81 Atque illum comes in silvas persaepe secuta
 82 praedam avium innumeram rettulit inde domum.
 83 Dum te igitur nemore in medio atque in valle latentem
 84 aut hoc aut aliud, candide Bocca, tenet
 85 dulce voluptatis genus ; ac tibi praegravat armos
 86 aut avis, aut humero pendet utroque lepus,
 87 seu positi ripae saliunt in gramine pisces :
 88 mi celer egelidis temperat Arnus aquis
 89 ingentes aestus et quo non ulla calorem
 90 majori potuit surgere messis agris ;
 91 aut etiam in densa recubanti molliter umbra
 92 una aufert curas Calliopea graves.
 93 Nec dolet incassum tantos cessisse labores
 94 votaque successus non habuisse ratos :
 95 sed saepe ad versus furtim numerosque relabens,
 96 quod famam in longum proroget, urget opus.
 97 Urget et ad studium clari se suscitatur oti,
 98 maeroremque animi, qua licet, arte levat.
 99 Spemque facit nostrum non ullo nomen in aevo
 100 sensurum longi temporis esse situm.
 101 Quod si praestabunt Musae, si rara bonorum
 102 turba olim, si me saecula fuisse ferent,
 103 si vixisse meis jucundum semper amicis
 104 et sanctam sancte percoluisse Fidem,
 105 atque adeo purae si puriter omnia vitae
 106 audiet egisse haec tempora posteritas,
 107 non ego Pactolus quicquid vehit amnis arenae,
 108 quicquid et Ammerice terra beata gerit,
 109 Ammerice, cujus montes et flumina passim
 110 argento atque auro divite multa fluunt
 111 tectaque fulgenti splendent onerata metallo,
 112 inque pavimentis aurea lamna nitet
 113 plurima et isignes ornant sua pocula gemmae,
 114 perque vias omnes lucidus ardet onyx ;
 115 non Arabum silvas, non quas legit Africa messes
 116 optarim, non quas congerit aequor opes.
 117 Et modo mi dulces pandant sua sacra Camenae,
 118 despiciam reges barbara Memphi tuos.

IN OBITUM SICINII PEPULI

C1_5 v.1 Si pia, quae debent, solverunt justa poetae
 2 fundentes udis ex oculis lacrimas
 3 Sicinio, Pepulorum alto quem sanguine cretum
 4 ante suum rapuit mors violenta diem,
 5 cur ego, quantum in me est, illustri carmine funus
 6 non celebrem et mutos ad tumulum cineres
 7 voce vocem magna dicamque novissima verba,
 8 I, licet, o, vale, o, jam mihi culte vale ?
 9 Culte vale, o puer et juvenis fortissime, nec me
 10 oderis, extremus quod tua facta cano.
 11 Illa ego saepe meis volui contexere chartis
 12 et longam de te conficere Iliadem,
 13 sed me tentantem deterruit et pudor et mens
 14 conscia, quae tantum suscipere ausa oneris
 15 numquam esset certe, ni Claricinius unus
 16 (unus amicorum est qui mihi praecipue
 17 observandus et aeterna pietate colendus)
 18 hoc nostrum carmen jure suo eliceret.
 19 Et vero quisnam propriis ita viribus audax
 20 fideret, aut tantum hoc aggredere opus ?
 21 Ipse etenim proavis atavisque a regibus ortus,
 22 quorum olim justo paruit imperio,
 23 quae sese latis spatiosa Bononia campis
 24 explicat, urbs magna nobilitate potens,
 25 atque usu bellorum acris studiisque Minervae,
 26 et multum fecundi ubere dives agri,
 27 urbs, in qua illustri primorum sanguine natus,
 28 et veterum multis clarus imaginibus,
 29 fulsit muneribus fortunae ornatus itemque
 30 floruit innumeris ipse bonis animi.
 31 Et primum quascumque artes docuere priores
 32 ingenuas, toto pectore sic coluit,
 33 ut sive is carmen faceret, sive ore rotundo
 34 dictaret certo verba soluta pede,
 35 Callimacho et magno propius certaret Homero,
 36 nec flueret culto jam Cicerone minor.
 37 O quoties illum, teneros dum cantat amores,
 38 horrida dum fortes cogit in arma viros,
 39 dum sociis alios aliosque in pectore motus
 40 excitat atque animos arbiter unus habet,
 41 et juvenes blandi et faciles arsere puellae,
 42 et valde audaces obstupuere duces,
 43 nec minus admirata senum turba ore pependit,
 44 et dubitavit utrum doctior an melior
 45 esset et innumeris animi virtutibus ipsas
 46 aequaret dotes corporis egregias :
 47 et formae immortale decus atque oris honores
 48 et, quale in tenero pectore robur alis
 49 non habuit. Nam seu jaculum libraret ab aure,
 50 seu gladium in saevos stringeret ausus apros,
 51 haud ullae fugere ferae, sed morte peremptae
 52 effudere animas pectore quaeque suas.
 53 Quin, ubi cessit equo lentas moderator habenas,
 54 seu cursum Zephyris flantibus antetulit,
 55 non dorcas, non cervus abit securus, amicas

56 ut sese pernix abderet in latebras,
 57 sed sensit celerem vestigia pone sequentem,
 58 comprehensusque fuga constitit in media.
 59 Ac velut Aeacides magni Chironis alumnus
 60 non solum doctus fila movere lyrae
 61 suaviter et versu laudes celebrare puellae,
 62 verum etiam saevas sternere caede feras
 63 et celerem in silvis jaculum transfigere tigrim
 64 et cursu rapidos equiparare Notos,
 65 terruit invictas audax in proelia gentes
 66 et Xanthi multo sanguine tinxit aquas
 67 Trojaeque infanda permiscens omnia caede
 68 extremum virtute attulit exitium :
 69 sic illum indutum galea et praestantibus armis
 70 (nec dum etiam teneras inficere ulla genas
 71 coeperat et nusquam lanugo induxerat umbram)
 72 caerulea timuit frigidus Albis aqua.
 73 Germanas cum forte arces atque oppida Caesar
 74 parere ipse suo cogeret imperio :
 75 heu, quas tunc hiemes, heu, quae tum frigora passus,
 76 quam saepe obscaenam pertulit ille famem ?
 77 Quam saepe ingentes mira virtute labores
 78 suscepit, noctes egit et usque vigil ?
 79 Interdum plantas glacies hiberna secabat,
 80 plurimus et subter pellibus imber erat.
 81 Omnia torpebant gelida concreta pruina
 82 pendebatque altis stiria ab arboribus :
 83 ipse alacer tamen assidue sua munia obibat,
 84 hostibus et duris maximus horror erat.
 85 Dumque neces inter durique incommoda Martis
 86 committit valida proelia torva manu,
 87 Arctoas urit flammis atque igne puellas,
 88 et teneras magno torquet amore nurus.
 89 Quantum autem, seu sint nuptae, seu tempore in ullo
 90 nullius norint tempora conjugii,
 91 depereant praeclarum armis pulchrumque juventa,
 92 et Scylla infelix et Sthenoboea docent.
 93 Altera nam certi violato foedere lecti,
 94 quam Venus in cura supplice corruebat,
 95 non juveni exitium insonti labemque perennem
 96 intulit ? Et sanctum polluit hospitium ?
 97 Cumque decus Divumque illi peperisset honores
 98 et sciret delapsam aethere praecipitem,
 99 ipsa sibi fauces laqueo praecusit amoremque,
 100 atque omne una odium depulit ex animo.
 101 At virgo infelix, rara virgo incluta forma,
 102 quam subitos ignes ossibus implicuit ?
 103 Tempore quo Minos magni Jovis incluta proles
 104 ultor atrox urbem sedit ad Alcathoen,
 105 Androgeoneae poenam necis inde repositens
 106 et longa miseris obsidione premens.
 107 Namque ea tum cari vastantem regna parentis
 108 vidit et, heu, flagrans hostis amore sui,
 109 non hominum morem, non jus, non impia legem
 110 naturae, non et caelicolum verita est
 111 numina, quae supera nos e regione tuentur
 112 et merito sontes supplicio afficiunt :

113 purpureum quin illa patris de vertice crinem
114 velleret et totum proderet imperium
115 Minoi, quem tum faciebat bellica virtus
116 insignem atque annis grata juventa suis.
117 Aut nihil, aut paulo cui tum concedere dignum
118 Sicinium, Germanae appetiere nurus.
119 Atque aliqua ex illis animum jam saucia dixit :
120 "O certe ex alto sanguine nate puer,
121 quis nunc infestum nostras te duxit ad oras,
122 ut nobis ferres omnibus exitium ?
123 Namque viros bello ingenti et praestantibus ausis,
124 et nos aspectu absumis inique tuo.
125 Nec tamen optarim saevo te occumbere leto,
126 vel formosa novo membra rigere gelu.
127 Ipsa ego te potius patria regione relictā,
128 quocumque abscedes, consequar incolumem ;
129 et tibi jucundo famulabor serva labore,
130 indignam si me forsitan esse putes,
131 quae tecum patriae sublimi in sede recepta
132 degam, atque optato semper amore fruar."
133 Haec illa. At juvenis, stimulis quem gloria agebat
134 acribus, haud ullas audiit aure preces,
135 sed bello confecto omni se serus ad aedes
136 ornatum claris rettulit exuviis,
137 quasque adeo praedas ex hostibus egerat, omnes
138 partitus, fidos dididit in socios,
139 quos ante electos secum deduxerat urbe,
140 et sibi nil prorsus, quam decus egregium,
141 et, quam quaesierat, laudem servavit, in armis,
142 et famam, aeterna in saecula quae vigeat.
143 Excepere viri redeuntem hilaresque puellae
144 sparserunt violis purpureisque rosis ;
145 et tacitae : "O felicem illam, quae prima cubile
146 ascendet conjux sola futura tuum."
147 Ergo illum forma insignem et virtute decorum
148 optabat generum jam sibi quisque suum,
149 atque incredibili jam quaeque ardebat amore
150 et facie virgo et moribus ingenuis,
151 cum Mars ad caedes et ad horrida bella vocavit
152 rursus et Ausonios civit ad arma viros,
153 arma, quibus latos tepefecit sanguine campos,
154 funditus et miseram perdidit Italiam :
155 Mars, et Musarum atque otii teterrimus hostis,
156 solus et humani dira lues generis,
157 Mars horum, quae nunc patimur, causa una malorum,
158 atque auctor nostri maximus excidii ;
159 qui nempe et miscens incendia plurima bello
160 impius Europam territat atque Asiam.
161 Nicia tunc, humilisque unda frigente Gabellus,
162 quaeque utrimque suo margine pressa fluit
163 Scultenna, innumeros spectavit stragis acervos
164 et multo intepuit aucta cruore virum,
165 Sicinii virtus quos et bona dextera bello
166 obtruncans campos misit ad Elysios.
167 Praerupto veluti demissum e vertice flumen,
168 quod moles, quod non sistere saxa queunt,
169 praecipiti fertur lapsu victorque per agros

170 volvit agens quercus et stabula alta ruit,
 171 atque ipsa ingenti percellit moenia fluctu,
 172 et nullum est, quod non turbet iter populi.
 173 Post ubi depressum veterem subsedit in alveum,
 174 visuntur turpi semisepulta luto
 175 jumenta et foedae pendent sine honore ruinae,
 176 et virgulta humili strata jacent capite
 177 evulsaeque jacent passim ab radicibus orni,
 178 et quaecumque arbos obruta vorticibus
 179 dejecit ramos omnemque amisit honorem,
 180 post neque verno umquam sole, neque imbre viret.
 181 Cumque acres audendo hostes persaepe fugaret,
 182 disceret et jam jam vincere consilio,
 183 atque dolos belli varios eludere et artes,
 184 et magno cunctis esse metu inciperet :
 185 ecce Patris magni jussu concedit in urbem,
 186 ut procul Hispanos Parthenope ejiciat.
 187 Talia sed venti discerpunt irrita vota
 188 sollicitaeque movent numina nulla preces,
 189 quae late imperium viresque tuentur Iberas,
 190 atque omni Gallos Ausonia prohibent.
 191 Nam te florentemque annis opibusque potentem
 192 abstulit ante tuum mors inimica diem ;
 193 abstulit, heu, primae primo sub flore juventae,
 194 et tecum patriae spemque decusque tuae.
 195 Quod belli auspiciam tam dirum et triste secutus
 196 exitus, evertit prorsus opes Latii.
 197 Ex illo quia res retro coepere referri,
 198 atque adeo in pejus praecipites ruere.
 199 At tibi pro virtute puer, pro fortibus ausis
 200 (quandoquidem haec non sunt carmina nostra satis)
 201 devoveant, docti scribunt quaecumque poetae,
 202 nulliusque tua pagina laude vacet.

AD PHILIPPUM HURALTUM CHIVERNIUM FRANCIAE PROCANCELLARIUM,
 IN OBITUM CHRISTOPHORI THUANI

C1_6 v.1 Si quisquam est, Huralte, tuos qui sistere fletus
 2 te velit et lacrimis ora rigare vetet,
 3 quod magnum abstulerit mors importuna Thuanum,
 4 et nimium cives laeserit ausa tuos,
 5 scilicet huic fuerint rigido praecordia saxo
 6 pectoraque infestis asperiora rubis.
 7 Ipse ego, quem Tuscis nascentem in collibus olim
 8 vidit et affusis abluit Aesar aquis,
 9 jacturam luxi tam lecti herois humique
 10 deposui Latiae plectra sonora lyrae :
 11 plectra, quibus laudesque tuas, tua facta canebar
 12 Gallia, quae Solymos eripuerunt jugo
 13 inque Palaestina tantum statuere tropaeum,
 14 quantum nulla patrum commemorare valent
 15 saecula, cum victus terrarum paruit orbis
 16 legibus atque armis Martia Roma tuis.
 17 Parcite felices animae : felicibus astris
 18 progeniti heroes, gens adamata Deo ;
 19 parcite, dum vestro redivivum e sanguine alumnum,

20 virtutum exemplar nobile flere juvat.
 21 Quo nemo antiquae propior contendere laudi
 22 dictus et ad verum pressius ire decus.
 23 Ille quidem veterum non infitiandus avorum
 24 sanguis et aetatis gloria flosque suae,
 25 clarorum illustri prognatus origine patrum,
 26 quorum urbem placidis Sequana lambit aquis,
 27 Axona cui Ligerisque et Matriona cuique Garumna
 28 submittere uno hoc nomine saepe genu.
 29 Gratati tantum decoris tibi, Sequana, tantum
 30 caelicolas uni contribuisse boni.
 31 Nec tamen, haud suetus causa hac sibi sumere fastum,
 32 se reliquis renuit civibus ire parem.
 33 Sed potius, cum se claris genitoribus ortum
 34 sciret et a magnis ducere nomen avis,
 35 et genere hoc etiam praestantem laudis, honores
 36 ad summos facili tendere posse via,
 37 verum illud decus esse ratus, quod strenuus armis,
 38 vel placidus potuit quisque parare toga,
 39 maluit inniti sola virtute bonique,
 40 quae fecere patres, credidit esse patrum,
 41 inclyta quo seris exposita nepotibus olim
 42 excirent natos ad benefacta suos.
 43 Ergo ille ingenuas ut primum accingier artes
 44 atque Heliconiadas coepit adire deas,
 45 ante omnes Phoebos gratissimus, ilicet unus
 46 pangebatur grandi carmina culta sono.
 47 Qualia Tyrtaeus fertur cecinisse suosque
 48 in bellum Oebalios exacuisse viros,
 49 cum maribus numeris hostem fudere Lacones
 50 accensi et victis imposuere jugum.
 51 Certe illum insueta miratus voce canentem
 52 Sequana caeruleum sustulit amne caput
 53 et secum : "O, quantos excit virtutis amores,
 54 o animos quanta laude perurit ! " ait.
 55 Ipse autem excedens pueris puerilia longe
 56 abjicit et certis verba ligata modis.
 57 Et studiis natus jam tum vigilare severis,
 58 maxima quae rerum pondera ferre docent,
 59 edidicit solers leges et jura Quiritum,
 60 et patria sanctum quicquid in urbe fuit.
 61 At nihil est ullis terrarum in finibus actum,
 62 cum bello aut tuta pace tenentur agri,
 63 quod non ille animo memori mandarit habendum,
 64 unde suis ferret, cum foret usus, opem.
 65 Nemo igitur tantis instructior artibus umquam
 66 tractatum causas fertur adisse forum,
 67 nec patrociniis aequae juvisse clientes,
 68 aut poenae plures eripuisse reos.
 69 Scilicet oranti Cicerone disertius ipso
 70 nil quod non iudex crederet aequus, erat.
 71 Illi ingens gravitas, illi probitasque pudorque,
 72 et vitae integritas duxque comesque piaae ;
 73 atque ideo cunctis perfunctus honoribus, unus
 74 consessu princeps praefuit inde patrum.
 75 Ingentique illum moderatus laude senatum,
 76 quo nil terrarum sanctius orbis habet,

77 rexit bis denos incorruptissimus annos :
78 atque indefessus nobile munus obit.
79 Consilio in dando sententia libera et una
80 servandi cives maxima cura suos ;
81 ante oculos constans regni splendorque decusque,
82 et summa in Regem cum pietate fides ;
83 pacis mirus amor, mens rerum inimica novarum
84 semper et haud usquam desidiosa quies.
85 Ceu postquam utilibus sitientia prata rigavit
86 imbribus atque agris praebuit amnis aquas,
87 labitur et cursum nusquam remoratus et undam,
88 solibus assidue fert alimenta novis,
89 immensum Oceani dum se provolvit in aequor,
90 quaque potest, pelagus commodus auctat ope.
91 Hic quoque talis erat confecta negotia postquam
92 viderat atque aliquid temporis esse super.
93 Namque suis illud privatim impendere amicis,
94 sive his in studiis ponere suetus erat,
95 quae curis animum assiduis relevare gravatum
96 et cives aliqua parte juvare solent.
97 Ergo etiam acceptos Musis juvenesque senesque
98 amplecti et praesto semper adesse bonis
99 omni ope et omni opera : neque enim differre juvandi
100 tempora, nec duro despuere ore preces
101 cujusquam, aut miseri voces ridere clientis,
102 dum sedet aut clausas ambulat ante fores.
103 Hunc ego te si flere vetem, si conqueri ademptum
104 Chiverni, in quo uno periere bona,
105 quis mihi vel ferrum, vel durum adamanta rigentis
106 ipsius in latebris pectoris esse neget ?
107 Sim stipes, sim truncus iners simque horrida cautes,
108 quam nec vis Boreae, nec movet unda loco,
109 ulla suo, verum abruptis exposita procellis
110 nullo aestu, nullo frangitur illa gelu.
111 Occidit hujus honos et gloria maxima saeculi,
112 occidit et patriae spesque salusque tuae.
113 Atque ego te plenos lacrimarum fundere rivos,
114 et manibus pectus tundere et ora vetem ?
115 Tu vero heroem, qualem non ulla tulerunt,
116 qualem etiam posthac saecula nulla ferent,
117 deflendo susceptum animo testare dolorem
118 et lacrimis laxa claustra revulsa piis.
119 Hoc ipse, hoc conjux lectissima femina, tanto
120 digna patre et tanto femina digna viro,
121 hoc nati nataeque et pignora cara nepotes,
122 hoc omnis tecum Gallia tristis agat.
123 Et tamen ante oculos ejus versetur imago
124 et constans vitae perpetuusque tenor.
125 Qualis erat, natum cum grandem et honoribus auctum
126 ipse suum vidit morte repente rapi,
127 invictusque animo vultuque immotus eodem
128 pertulit afflictas tristitia damna domus.
129 Nec vero indoluit casu concussus acerbo,
130 scilicet humanas has memor esse vices :
131 ut nunc fortuna, si qua est fortuna, feramur
132 in caelum, pressi nunc jaceamus humi,
133 ni forte externo mens inconcussa tumultu

134 perstet et incoeptum pergere tendat iter,
 135 nec sese ipsa sua patiatur sede revelli,
 136 dum, sua quae non sunt, cogitat esse sua.
 137 Ille quidem quacumque in re sibi fidere doctus
 138 imperturbato pectore dura tulit.
 139 Nec, sua res quamvis fluerent ad vota secundae,
 140 non servasse modum dicitur atque decus.
 141 Ut mirum non sit, Superis si gratior omnes
 142 transierit felix et sine labe dies,
 143 ac spatia extremae confecerit usque senectae
 144 viribus, ingenio, corpore, mente vicens.
 145 Decessit certe fortunatissimus uno hoc,
 146 (nam quis quae restant enumerare queat ?)
 147 Quod sibi te generum moriens Huralte reliquit
 148 consilio et morum commoditate parem.
 149 Quem merito evexit rerum prudentia ad altum,
 150 doctrina et virtus quo tua digna, gradum.
 151 Officiis cujus meritas persolvere grates
 152 meque animi memoris dum dare signa juvat,
 153 quae fidis impressa notis non deleat aetas
 154 ulla, nec extingui Musa diserta sinat.
 155 Haec ego si maesta cecini tibi carmina voce,
 156 interventu etiam forte molesta suo,
 157 excuset factum simplexque et grata voluntas,
 158 nec non et jussis obsequiosus amor.

LIBER SECUNDUS

AD FERDINANDUM MEDICEM CARDINALEM ET AD PETRUM FRATRES
 MEDICES COSMI MAGNI DUCIS HETRURIAE FF.

C2_1 v.1 Nullane vos hiemis species jam certa propincae,
 2 nec saevi Boreae vis inimica fugat ?
 3 Et tamen excessere istis e finibus omnes
 4 saetigerique sues capreolique leves.
 5 Ac jam prata rigent niveis incana pruinis,
 6 et nulla est, quae non torpeat unda gelu.
 7 Ecquid vos igitur nudis remoratur in arvis ?
 8 Ecquid, ubi nihil est quod juvet, esse juvat ?
 9 Hic soles tepidi assidue caelumque salubre,
 10 hic viridis multo gramine ridet humus.
 11 Laetaque coturnix fecundus pervolat agros,
 12 et multo gelidae pisce natantur aquae.
 13 Hic fruges passim depascitur improbus anser
 14 rimaturque amnes ingluviosus anas.
 15 Haec etiam Lydo non invidet unda Caystro,
 16 cycnorum innumeros, quos alit ille, greges.
 17 Quin damae et lepores inter fruticeta vagantur,

18 inque volutabris plurimus horret aper.
 19 Ecquid adhuc statis, Tyrrhenae o regia gentis
 20 germina et Ausonii spes rediviva soli ?
 21 Vos nemora et silvae, placidi vos aura Favoni,
 22 vestraque vos Tusci litoris ora vocat.

AD VESPASIANUM GONZAGAM DUCEM SABLONETAE

C2_2 v.1 Innumeros potui merito Gonzaga labores,
 2 aestusque et brumae frigora dura pati,
 3 sive per horrentis Pindi juga, sive per Haemi
 4 anfractus varia persequor arte feras :
 5 cum modo tantum in me decoris, cum tanta redundet
 6 gloria, cum tantus tamque petendus honos,
 7 quantum et quale decus, quanta est ea gloria, quantus,
 8 qui mihi vel vita est carior unus, honos,
 9 dum dignum statuis, quem per nemora alta sequaris,
 10 qua nulli e nostris contigit ire via.
 11 Hunc tu igitur si non plane reprehenderis, ipse
 12 conatum incipiam jure ego amare meum.
 13 Namque uni placuisse tibi quibus evenit, iisdem
 14 evenit, ut placeant jam sine fraude sibi.

DE XIII ITALORUM CUM XIII GALLIS PUGNA IN PEUCETIIS
 EX PROVOCATIONE COMMISSA

C2_3 v.1 Quisquis es, egregiis animum si tangeris ausis,
 2 perlege magnorum maxima facta ducum.
 3 Hic tres atque decem forti concurrere campo
 4 Ausonios Gallis altus adegit amor,
 5 certantes utros bello Mars claret et utros
 6 viribus atque animis auctet alatque magis.
 7 Par numerus, paria arma, pares aetatibus, et quos
 8 pro patria pariter laude perisse juvet.
 9 Fortuna et virtus litem generosa diremit :
 10 et, quae pars victrix debuit esse, fuit.
 11 Hic stravere Itali justo in certamine Gallos,
 12 hic dedit Italiae Gallia victa manus.

AD ISABELLAM MEDICEM COSMI MAGNI DUCIS HETRURIAE F.

C2_4 v.1 Quam modo multiplici contextam ex arte corollam
 2 in manibus pono dia Isabella tuis,
 3 ante mihi intacta legere e valla Napaeae,
 4 quo ferrum nemo, nemo agit ausus oves.
 5 Sola apis Hyblaeos delibat Hymettia flores,
 6 dum strepit et dulces construit inde favos.
 7 Tu vero decora ista tuae cape debita fronti,
 8 a casta veniunt quae tibi dona manu.
 9 Mollis odoratas hic fundit amaracus umbras,
 10 illius et circum plurimus extat honos.
 11 Quique thymus varios inter viret unus odores,
 12 excoluit puris hunc pudor unus aquis.

AD EANDEM

C2_5 v.1 Si tibi quae praestans animus, quae gloria gentis,
 2 quaeque adeo eximiae formae honor usque tuae
 3 postulat, o veterum decus immortale parentum,
 4 magnorum o proles suspicienda ducum,
 5 pro meritis Isabella tuis fortuna dedisset,
 6 unica terrarum tu domina orbis eras.
 7 Sed timuit, ne te rerum potiente jaceret,
 8 victaque virtuti cederet ipsa locum.

DE HIRUNDINE, QUAE PULLOS STRANGULAVIT SUOS

C2_6 v.1 Avolat e pueri manibus ludentis hirundo
 2 pone trahens nexo pendula fila pede.
 3 Utque refert dulcem natis implumibus escam
 4 et nidi in summo margine laeta salit,
 5 arentes tenuis longo subtegmine lini
 6 perdita festucas implicuisse videt.
 7 Heu quid agat ? Peritura fame circumvolat, et quam
 8 attulerat miseris damnat et odit opem.
 9 Ergo illis laqueum cervici innectit et omnes
 10 interimit natos, pignora cara, suos.
 11 Proh scelus infandum ! Quis jam te barbara Progne
 12 credat Itym manibus non jugulasse tuis ?

AD FERDINANDUM MEDICEM CARDINALEM

C2_7 v.1 Venaris Fernande lupos atque omnia late
 2 reddis Amyclaeo pascua tuta cane.
 3 Roma igitur tantae plaudit laetissima praedae.
 4 Cur ita ? Non Martem, sed colit illa Jovem.

DE AQUILA IN AERE INTEREMPTA A MARIO URSINO

C2_8 v.1 Dum pedibus leporem fulvus Jovis ales aduncis
 2 fert celer et liquidum radere pergat iter,
 3 vulnere letalis (quis credat ?) In aere baccae,
 4 quae Chalybe e medio protinus acta ruit,
 5 labitur ; in praecepsque imum per inane volutus
 6 et vitam et vitae gaudia linquit humi.
 7 Labentem vidit Divum pater aethere ab alto :
 8 "Et sua mortales fulmina (dixit) habent."

DE EADEM

C2_9 v.1 Aerias aquilae nubes atque astra petenti
 2 letali Marius pectora glande ferit :
 3 fistula quam media discludit aenea flamma,
 4 cum primum injecto sulphur ab igne micat.
 5 Atque illam excipiens tellus memor : "En mea proles
 6 in Superos (inquit) fulmen et ipsa jacet."
 7 Quod quamquam fratres non ulciscetur ademptos,

8 haec tamen haud posthac suggeret arma Jovi.

DE LUSCINIA AVE

C2_10 v.1 Luscinia in summo consueta quiescere ramo,
 2 cui vitem agricolae junxerat ante manus ;
 3 dum partim somno indulget, partim excita cantu
 4 exercet questus irrequieta suos,
 5 capreolis alte serpentibus, unde racemi
 6 pendentes stabili sustineantur ope,
 7 vinciri crura imprudens non sensit et arte
 8 innecti alterutri vincula dura pedi.
 9 Quo decepta dolo et detexto in vimine clausa,
 10 conticuit multos maesta silensque dies.
 11 Delicias sedenim postquam sese esse puellae
 12 vidit et a rosea pascier usque manu,
 13 facta loquax iterum cantus integrat amicos,
 14 et dominae somnis obsequiosa favet.

AD FRANCISCUM MEDICEM MAGNUM DUCEM HETRURIAE

C2_11 v.1 Justitiae nullus cum jam locus esset in urbe,
 2 Dux magne, imperii quae caput una tui est,
 3 cunctaque muneribus donisque oppressa jacerent,
 4 et, nisi non inopis, gratia nulla foret :
 5 fers legem poenasque graves certissimus addis,
 6 ne donari aliquid, ne recipive queat.
 7 Protinus ergo aditus sancto patuere pudori
 8 et turpi a quaestu se abstinuere manus.
 9 Inde tibi grates agimus, Dux optime, quorum
 10 injustos sumptus non patiuntur opes.
 11 Quaeque aliis erat atque aliis exposita rapinis
 12 urbs tua, nunc demum se videt esse tuam.

AD MARIUM URSINUM DE CICONIA INTEREMPTA

C2_12 v.1 Unguibus et duro dum forte ciconia rostro
 2 versantem colubrum lubrica terga rapit,
 3 percutitur bacca, media quam ferrea flamma,
 4 ceu fulmen, tereti fistula ab ore jacit.
 5 Ergo cadit : prodestque nihil coluisse parentem
 6 et quod cum dira proelia gente gerit.
 7 Tu vero, qui totum uno certissimus ictu
 8 alituum sternis, cum libet, agmen humi,
 9 quem fugisse nequit manni post terga latentem
 10 seu mergus, seu sit grus, olor, anser, anas :
 11 parce pias posthac placidarum in caede ferarum
 12 sanguine tam innocuo conscelerare manus.

DE EADEM AD EUMDEM

C2_13 v.1 Candida dum medium curvis rapit unguibus hydrum
 2 grataque longaevo fert alimenta patri :

3 labitur heu dira percussa ciconia glande
 4 et duro coluber liber ab ore fugit.
 5 Proh scelus ! Exitium pietas illi attulit : ast hic,
 6 cui vita in primis noxia, sospes abit.
 7 Quae nam igitur te, saeve Mari, non praedicet aetas
 8 insonti tinctas sanguine habere manus ?

EX GRAECO

C2_14 v.1 Concreto ut pueri rapiunt e flumine crustas,
 2 cum brumae atque hiemes obriguere gelu ;
 3 post autem, ut digitos pervasit frigus et una
 4 torpor iners molles occupat articulos,
 5 nec quod obest retinere queunt, nec ponere norunt,
 6 dum glacies teneras urit iniqua manus.
 7 Gaudia sic primum juvenes in pectore versant,
 8 quos Placito Veneris contigit igne puer.
 9 Dein vero, ut pestem mediis hausere medullis,
 10 quae cunctas animi depopulatur opes,
 11 discupiunt miseri renuuntque exstinguere flammam :
 12 et piget et lenta morte perire juvat.

IN SPES

C2_15 v.1 Dum circumvolitant animum spes et tibi votis
 2 omnia promittunt uberiora tuis,
 3 tu procul, ut moto muscas aestate flabello,
 4 dum facto hinc illinc agmine in ora volant,
 5 fac abigas. Aliter misere torquebere teque
 6 jam vixisse aliis, non tibi flebis inops.

AD FRANCISCUM PANICAROLAM

C2_16 v.1 Orantem qui te non audiit, Attica nescit
 2 et Romana tuae quantum facundia linguae
 3 cedat et eloquio devicta assurgat Etrusco.
 4 Affluit at quicumque semel dum dicis et asper
 5 exterres sontes, aperisve arcana Tonantis,
 6 nec se immutavit, nec sustulit ardua supra
 7 sidera : vos talem terris avertite pestem
 8 caelicolae, indignum vos mergite pondus Averno.

AD PAULLUM MANUTIUM

C2_17 v.1 Quantum Roma sui Ciceronis maxima linguae,
 2 tantum lingua tibi debet Ciceronis ; et uni
 3 una tibi quod vivit adhuc, quod floret ubique,
 4 et colitur, refert acceptum culte Manuti.

AD EUMDEM

C2_18 v.1 Exorta est tecum culti Ciceronis imago :

2 et vivit tecum et tecum moriatur oportet.
 3 Vive igitur mi Paulle diu, diu ut illa superstes
 4 vivat, et hoc uni praesens tibi debeat aetas.

AD LAURENTIUM IACOMINIUM

C2_19 v.1 Laurenti, o pulchris virtutum insignibus aucte,
 2 o, et Tyrrheni flos et ocelle soli.
 3 Quid prius ipse in te mirer ? Studiine labores ?
 4 Queis tibi sublimem sternis ad astra viam.
 5 An vero ingenium ? Cujus vim saepe sororum
 6 Aonidum dulces obstupuere chori.
 7 Externas quoniam dotes, quibus affluis, ipse
 8 consuesti haud propriis adnumerare bonis.
 9 Ast ego, cui virtus summis est proxima Divis,
 10 illa prius, mox haec singula suspicio.
 11 Omnia namque in te qui non miratur amatque,
 12 quaeque tacens novit dissimulare potest,
 13 ille uni sibi vim nimirum injurius affert
 14 splendidaque invidiae dat documenta suae.

IN EFFIGIEM BENEDICTI VARCHII

C2_20 v.1 Sacravit primam primo qui flore juventae
 2 aedibus aetatem Ractius hisce suam ;
 3 quod memoris gratique animi dare signa satisque
 4 officio factum, qua potis, esse cupit,
 5 hic ipsum Varchii posuit de marmore vultum :
 6 atque uno in vultu tres tibi nosse dedit.
 7 Historicum qualem quisquam vix legit, et ulli
 8 qualem oratorem nec meminisse queant,
 9 vatem autem, cui pauci audent contendere vates,
 10 sive illos Latium, Tuscia sive tulit.

AD IOANNEM ALBERTUM I.C.

C2_21 v.1 Si medicum merces sequitur sua, cum sua ab arte
 2 vitae aliquot nostrae prorogat ille dies,
 3 cur vatem, immortale aevum nomenque perenne
 4 cum parat, Alberti, praemia nulla manent ?
 5 Scilicet haud multi (neque enim res parva neque omnium
 6 corpore depressos apta movere animos,
 7 ni quos ad caelum stimulat contendere gressum
 8 gloria praeclarae mortis amica comes)
 9 dum luxu indulgent et somno, posse sibi se
 10 praestare hac tanta condicione putant.
 11 Nam quicumque bono dat praemia digna poetae,
 12 ille unus numquam jam moriturus obit.

AD ANTONIUM LANFREDINUM I.C.

C2_22 v.1 Si quem optare licet, qui cum traducere vitam
 2 possim atque aetatis tempora transigere,

3 ipse unus certe es, mi Lanfredine, diesque
 4 ac noctes, qui cum dulce sit esse mihi.
 5 Namque ii sunt mores eaque est doctrina tuique
 6 mirifice exculsi tanta animi probitas,
 7 ut quicumque semel tecum est congressus et inde
 8 non te amat ac sese quisque adamare solet,
 9 nesciat is quantas virtus habet aurea vires,
 10 quamque adeo vehemens vis sit amoris amor.

AD COSMUM MEDICEM MAGNUM DUCEM HETRURIAE

C2_23 v.1 Invicti paulo ante hostes, rex optime regum,
 2 opponunt castris dum sua castra tuis
 3 et late innumero populantur milite campos
 4 diripiuntque avida templa beata manu,
 5 nusquam maestae urbes, nusquam maesta oppida pro te
 6 cessarunt summo vota vovere Deo.
 7 Nunc autem, postquam caesis tot millibus, ipse
 8 solvisti ingenti tristia corda metu,
 9 passim laetae urbes, passim laeta oppida pro te
 10 festinant sancta solvere vota fide.
 11 Ut dubitemus utrum populo sis carior ipsi
 12 Cosme tuo, an populus carior ipse tibi.
 13 Sed certe haec laus est, haec gloria magna, superbos
 14 sternere humi et populis esse in amore parem.
 15 Dum te, Cosme, diu nimium Labrone morantem
 16 invidet Etrusci litoris Arnus aquis :
 17 exit et aggeribus ruptis lata aequora tranat
 18 spumeus et tumido gurgite vastat agros.
 19 Jamque avidis molem aggressus sese apparat undis
 20 vertere et antiquas obruere amne domos.
 21 Seu nos ergo istuc fugientes excipe, seu tu
 22 huc, ut subsidat, maxime Cosme veni.

C2_24

AD EUMDEM

v.1 Dum te, Cosme, diu nimium Labrone morantem
 2 invidet Etrusci litoris Arnus aquis :
 3 exit et aggeribus ruptis lata aequora tranat
 4 spumeus et tumido gurgite vastat agros.
 5 Jamque avidis molem aggressus sese apparat undis
 6 vertere et antiquas obruere amne domos.
 7 Seu nos ergo istuc fugientes excipe, seu tu
 8 huc, ut subsidat, maxime Cosme veni.

AD EUMDEM

C2_25 v.1 Viderat, Etruscum qua se ora extendit in aequor,
 2 Arnus, et opposita mole minatur aquis,
 3 jucundas te, Cosme, moras et tempora laetum
 4 conterere et ripas deseruisse suas :
 5 protinus ingenti concepta turbidus ira
 6 "Praefertur, video, jam mihi pontus (ait)
 7 quare agite, o Nymphae, cunctas effundite habenas,

8 quosque ego ditavi, nunc populemur agros.
 9 Quod si perstiterit spretis precibusque minisque,
 10 mox Arnum is pelago sentiet esse parem."

VOTUM PRO SUSCEPTA VENATIONE, AD DIANAM

C2_26 v.1 Sic tua Panchaeis fragrent altaria donis
 2 venantique omnes dent tibi terga ferae ;
 3 sic te nocturnas terrae incedente per umbras
 4 in triviis ululet sedula turba canum.
 5 Susceptum da Diva mihi decurrere munus
 6 et facili, quo jam coepimus, ire via.
 7 Instructi ut nostris venantes artibus olim
 8 audaci subeant horrida tesqua pede.
 9 Non ego tum variis spargam modo floribus aram
 10 suspendamque alto plurima dona tholo,
 11 sed caput immanis praefigam postibus apri,
 12 nec non et Scythicae cornua vasta ferae.
 13 Adsis, o Diana : tuus jam retia ponit
 14 et praedam toto litore Cosmus agit.

AD PETRUM VICTORIUM

C2_27 v.1 Si quem felicem ac vere statuere beatum
 2 quicumque expendant cum ratione bonum :
 3 ipse ille es certe Victori. Nam tua primum
 4 clarat te veteri nobilitate domus ;
 5 deinde valetudo firmum vegetumque senectae
 6 tradit et a puero continuata venit ;
 7 postremo virtus sese tibi pulchra suasque,
 8 nixa quibus graditur, sedula pandit opes.
 9 Cetera non referam : quando omnes undique terras
 10 plurima doctrinae sic monumenta tuae
 11 complerunt, ut te quoddam ceu numen ab astris
 12 delapsum cuncti mente animoque colant.
 13 Perge igitur, veterumque libros artesque juvato
 14 ingenuas omni qua potes unus ope ;
 15 perge, inquam, nobisque aperi quorum aurea magno
 16 cum damno in tenebris scripta sepulta jacent.
 17 Ipsaque tot meritis devincta fatebitur aetas
 18 nulla umquam tantum saecula tulisse virum.
 19 Nam si opus heroum proprium est prodesse futuris
 20 atque hominum praesens velle juvare genus,
 21 extinctis vitam lucemque afferre tenebris,
 22 quis Phoebi et summi jam neget esse Jovis ?

AD MARIUM COLUMNAM

C2_28 v.1 Et domus est Italis non ulla vetustior oris,
 2 quaeque vel ingenti nobilitate potens
 3 sit magis et summis heroum illustrior actis,
 4 pluribus et quae se claret imaginibus,
 5 quam tua, perpetuo magnorum e sanguine nobis
 6 orte ducum, o Latii spesque decusque Mari.

7 Et nemo est, seu dulciloquas coluisse Camenas,
 8 et facta ad caelum fortia ferre virum,
 9 seu luctantis equi duris calcaribus armos
 10 frangere, seu libuit tela movere manu,
 11 atque urgere acrem virtute et viribus hostem,
 12 audax qui sese praeferat ipse tibi.
 13 O felicem igitur fortunatumque Columnam,
 14 qui facere et docte scribere facta queas.

AD IO. BAPTISTAM ASINIUM

C2_29 v.1 Tu ne igitur verbis Asini me docte putasti
 2 parere et precibus non voluisse tuis ?
 3 Eadem opera potes et solem quoque credere caelo
 4 et nasci et radios fundere nolle suos ;
 5 aut etiam matrem puero nutricis egenti
 6 poscenti suetos posse negare cibos.
 7 Non ego sum, sceleris qui tantum suscipere in me
 8 ausim et tam turpis criminis esse reus.
 9 Non, si me duris in cautibus ipse tulisset
 10 Caucasus et Scythici barbara terra soli.

AD CHRISTOPHORUM CRESSIUM

C2_30 v.1 Ipse leves cernis Cressi conantur ut alae
 2 incudem ad caeli sidera ferre gravem.
 3 Conantur nimirum illae fecisse, quod omnes
 4 posse ulla fieri vix ratione putant.
 5 Quantum etenim levitate sua tolluntur in altum,
 6 tantum haec ingenti pondere vergit humi.
 7 Sic animo solet esse suo cum corpore pugna :
 8 dum corpus terras, dum petit astra animus.
 9 Verum illud praeclarum, in quo victoria laudem
 10 victori et victo tempus in omne parit.

IN VITEM

C2_31 v.1 Quae nam autem infelix regio, quae nam invia soli
 2 in Scythicis vitem hanc educat ora jugis ?
 3 An Celtarum alpes glacie nivibusque rigentes,
 4 fertilis an ferri nutrit Iberus ager ?
 5 Quae tam immaturos progignere sueta racemos
 6 commendat miseris tristia vina cadis.
 7 At tu quid cessas illuc properare Lycurge,
 8 et stirpem invisam dejicere ultor humi ?

AD ANTONIUM CIOFIUM I.C.

C2_32 v.1 Quas te horas vitae genio tribuisse Ciofi,
 2 vixisse et quando dicere te potero ?
 3 Numquam equidem. Nam te modo jus civile Quiritum
 4 explanandi ad se publica cura rapit ;
 5 et modo solventem dubiarum aenigmata legum

6 sevocat a nobis nobile Gymnasium.
 7 Quin etiam interdum turba importuna clientum
 8 obsidet, atque domi detinet assiduum :
 9 ut suspirandi nullum nullumque jocandi
 10 momentum videam temporis esse super.
 11 O vere studium sibi inutile, quod requietem
 12 nusquam habet ipsum, aliis quam peperisse solet.

IN INGRATUM

C2_33 v.1 Si laesus doleo, si, quem minus esse decebat,
 2 nunc illum in primis immemorem experior :
 3 vos, o, perfidiam quicumque haud fertis inultam,
 4 impia nec sinitis facta latere diu,
 5 vos o vos, inquam, caelestia numina, vos nunc
 6 testor et has imo pectore fundo preces :
 7 ut, si nil feci, si mens sibi conscia culpae
 8 nullius est, cur me fallere debuerit ;
 9 debuerit misero furtim subducere sese,
 10 et nostrae foedus frangere amicitiae,
 11 ipse olim infidi verbis deceptus amici
 12 accuset tacitus seque suamque fidem.

AD PETRUM ANTONIUM IACOMINIUM

C2_34 v.1 Aoniis o cura puer gratissima Nymphis,
 2 ante annos Cirrhae cui juga culta patent :
 3 adventantem ad se quem jam miratur Apollo,
 4 exceptum gremio quemque Thalia fovet.
 5 Perge celer, nec te revocet labor arduus usquam,
 6 quo te nunc primum gloria dulcis agit.
 7 Tempus erit tanto cum se Florentia alumno
 8 jactet et increscens altior Arnus eat,
 9 cum laudes nomenque tuum vivensque vidensque
 10 gaudebis ferri docta per ora virum.
 11 Ipse ego tum certe, seu jam per molle vagabor
 12 Elysium, seu mi vita superstes erit :
 13 "Nil quidquam Lethaea timens obliviam (dicam)
 14 deleri nomen non sinet iste meum."

DE IOLA

C2_35 v.1 Ille tuus, Pan semicaper, crinitus Iolas,
 2 ille, tuos cantus quem superare ferunt,
 3 dum capit umbrosae somnos sub tegmine pinus,
 4 solus Amor vigili pectore servat oves.
 5 Jamque cadunt altae summis de montibus umbrae,
 6 et prodire ferae, quae latuere, parant.
 7 Vestrumque aliqua, heu, Dryades illum excitet, ut ne
 8 fiat Amor saevis cum grege praeda lupis.

DE THYRSI PASTORE ET LAELAPE CANE

C2_36 v.1 Injussae rediere et oves simaeque capellae
 2 pascuaque ingenti deseruere metu.
 3 Sub quercu jacet exstinctus cum Laelape Thyrsis :
 4 Jupiter hos saeva sustulit ipse manu.
 5 Eheu, quis posthac aget in nemora alta capellas ?
 6 Aut quis lanigeras jam tueatur oves ?
 7 Ille decus nemorum et pastorum gloria Thyrsis
 8 occidit et Laelaps gloria prima canum.

DE LACEDAEMONIA MATRE, EX GRAECO

C2_37 v.1 Effugit exanimis nudato corpore, cives
 2 dum miscens dubio proelia marte, Lacon.
 3 Obvia quocirca juvenem transverberat hasta
 4 mater et hos audax fudit ab ore sonos :
 5 "En patriam mentite tuam, mentite parentes,
 6 i nunc, atque hosti cedere disce locum."

AD DIONYSIUM LAMBINUM

C2_38 v.1 Lambine, implicitos cui vatum solvere nodos,
 2 cui datur exculpto suaviter ore loqui,
 3 Bargaeus tibi gratus agit doctissime grades,
 4 si non quas debet, quas tamen ipse potest.
 5 Quodque prius notae virtuti debuit, en se
 6 praesto offert meritis officiisque tuis.
 7 Tuque tibi constare voles si nunc quoque, munus
 8 quam levius, gratum tam magis istud erit.

AD BONAM VALETUDINEM

C2_39 v.1 Si genio indulsi, si vitam suaviter omnem
 2 traduxi, nostram dum colis ipsa domum,
 3 o, quam circumeunt unam lususque jocique,
 4 et cum lasciva matre protervus Amor :
 5 hunc mihi da taetrum e membris deponere morbum,
 6 qui cunctas imo pectore laetitias
 7 expulit et, centum inducens uno agmine curas,
 8 mirificis mentem ludit imaginibus.
 9 Da taetram hanc pestem, toto quae corpore saevit
 10 improba, in extremos rejicere usque Getas.
 11 Et te redde mihi : spargam mox floribus aram
 12 ipse tuam et multa limina sancta rosa.

AD PHILOMELAM AVEM

C2_40 v.1 Ne cantus Philomela tuos, ne projice ad auras.
 2 Has quercus, haec tu robora dura fuge.
 3 Nec te decipiat, blandis quod saepe Napaeis
 4 ornarit varium querna corona caput.
 5 Hi tibi dum rami fundunt e cortice viscum,

6 exitium miserae perniciemque parant.
 7 Sunt virides Bacchi vites, est proxima myrtus,
 8 intra quas versus dicere tuta potes.
 9 Auratae teneris pendent e vitibus uvae,
 10 myrtus odoratas spargit opaca comas.
 11 Adde quod et numeros et dulcia carmina vatam
 12 et Venus et toto pectore Bacchus amant.

DE LUSCINIA AVE

C2_41 v.1 Aucepe dum trepide surgunt clamante volucres,
 2 et caecae properant accelerare fugam,
 3 implicitae maculis alas exsolvere tendunt,
 4 et miserae impediunt se magis atque magis ;
 5 sola inter cunctas elapsa effugit et altas
 6 luscinia in silvas libera facta volat.
 7 Ecquis, io, vates sacrum genus esse negabit,
 8 his avibus cum dent retia et ipsa viam ?

DE IOLA VENATORE

C2_42 v.1 Semicapri Panes et montivagi Satyrisci,
 2 quaeque alitis Dryades per nemora alta feras,
 3 hanc pharetram, hos arcus pinu suspendit ab alta,
 4 retiaque et Triviae cornua rauca suae.
 5 Utque caprae passim leporesque vagentur, Iolas
 6 constituit vobis hic jugulare canes.

DE DEMAENETA, EX GRAECO

C2_43 v.1 Octo olim natos bello Demaeneta raptos
 2 eodem omnes fertur contumulasse loco.
 3 Spargeret atque adeo lacrimas cum in funera nullas,
 4 "Hos (inquit) peperit terra Lacaena tibi."

IN OBITUM MYCONIS PUERI

C2_44 v.1 Exstinctum Dryades puerum flevere Myconem,
 2 Castalii puerum spemque decusque chori.
 3 Utque inter silvas, inter nemora ardua quondam
 4 nomine sub tanto saecula cana forent,
 5 has illae inscripsere notas radicibus imis :
 6 Pieridum periit spesque decusque Mycon.
 7 Ergo dum flabunt venti, dum robora vivent,
 8 induet et virides dum nova silva comas :
 9 non Thyrsis, non Daphnis erit, non notus Iolas,
 10 non alii, quos jam fama canebat anus ;
 11 audiet at caelum hoc vocem fundentibus ornis,
 12 Pieridum periit spesque decusque Mycon.
 13 Haec Dryades et cum laevum intonuisset Olympo
 14 Jupiter : "En vota haec jam rata (dixit) erunt."
 15 Altaque per Stygii juravit flumina fratris,
 16 nomine sub tanto saecula cana fore.

C2_45 v.1 Pulcher Hylas Acmen, Acme pulcherrima Daphnin
 2 deperit ; et Daphnis Chlorida, Chloris Hylan.
 3 Acme spernit Hylan, Daphnis pulcherrimus Acmen,
 4 et Daphnin Chloris candida, Chlorin Hylas.
 5 Filius hasce vices Veneris, Venus hasce Dione
 6 saeva jubet poenas legibus esse ratas.
 7 Idcirco horum alius, quantum ferus odit amantem,
 8 tam est alii tristis tamque odiosus amans.
 9 Discite vos igitur, qui vos male fertis amari,
 10 ultorem vobis post caput esse Deum.

C2_46 v.1 Qua patet aequoreas longe hinc prospectus in undas,
 2 cunctaque caeruleis impediuntur aquis.
 3 Mira fides : quondam silvae montesque fuerunt,
 4 oppidaque et rarum fertilis uber agri ;
 5 quodsi (namque potest nil non longinqua vetustas)
 6 nunc ubi sunt fluctus, pascua rursus erunt,
 7 cur ego non sperem Lalage mutetur ut olim ?
 8 Et veniat supplex, quae modo dura fugit ?

TUMULUS

C2_47 v.1 Et paucis natura mihi contenta meumque
 2 imbutum nullo crimine pectus erat.
 3 Non livor, non ambitio mala perculit, ut nunc
 4 hinc quoque mandarim nomen abesse meum.
 5 Denique nil pravum placuit. Si mentior, ipsa,
 6 qua tegor, aeternum sit mihi terra gravis.

IN OBITUM PHILIPPI TORNABONI EPISCOPI

C2_48 v.1 Qui vatum obscuras voces, qui scripta piorum
 2 suetus et ad sedes Divum aperire viam,
 3 et morum integritate et vita puriter acta
 4 aequavit (si fas dicere) caelicolas,
 5 exsuperans, qua parte potest, cuncta astra Philippus
 6 Tornabonus adit mente animoque Deum.
 7 Dumque illic vitae gaudet divina beatae
 8 gaudia, divinis perfruiturque bonis,
 9 oblitus mortalem animum sensusque rebelles,
 10 spectat ovans, illinc se sine quicquid agunt.
 11 Tum secum : "Aeternae pars o contraria luci,
 12 offudit tenebras nox mihi quanta tuas ?
 13 Jamdudum condaris humi. Me mole relicta
 14 corporis, aeternum sidera habere juvat."

TUMULUS LAODAMIAE PUELLAE

C2_49 v.1 Vita fuit, mea nata, brevis tua : cum tamen esset

2 dignior in terris vivere forma diu.
 3 Sic, injusta tibi justos quos abstulit annos,
 4 mors addet lacrimis, Laodamia, meis.

IN OBITUM HENRICI VALESII GALLORUM REGIS

C2_50 v.1 Henricum tristis cum jam Bellona videret
 2 cepisse invicta regna superba manu,
 3 moxque sibi generum partis emisse Philippum
 4 Austriacum et populis otia longa suis :
 5 indoluit celebrisque inter spectacula ludi
 6 obvia perfracta casside fudit humi,
 7 "Atque in connubii pacisque hoc foedere (dixit)
 8 quae caderet, nusquam victima major erat."

IN IMAGINEM DIDONIS, EX GRAECO

C2_51 v.1 Quam cernis, vera est magnae Didonis imago,
 2 haec Paphiam formae vincit honore deam.
 3 Talem me Tyrrii quondam genuere parentes,
 4 nec mea, quem credis, corda perussit amor.
 5 Numquam etenim Aeneam vidi, neque tempore eodem,
 6 quo cecidit Priami regia, Byrsa fuit.
 7 Ipsa mihi, ne me Libycus poteretur Hiarbas,
 8 conscivi mortem fortiter ausa manu.
 9 At vos impuro Musae favisse Maroni
 10 non pudet et tantum sustinuisse nefas ?

IN AMMANNATI ANTAEUM

C2_52 v.1 An ne hoc Alcides in signum est versus ? Et ille,
 2 terra novas vires cui modo tacta dabat ?
 3 Anne Ammannatus caelo vim fecit ? Et aeri
 4 spirare ac voces edere posse dedit ?
 5 Namque, animam pressus qui nunc (viden') efflat ab ore,
 6 jam jam pondus iners projicietur humi :
 7 cedet et hinc, duris hostem qui dura lacertis
 8 urget et invictis pectora pectoribus.
 9 Quod si forte suum differt victoria finem,
 10 et fracti nondum pectoris ossa crepant,
 11 longam hujus decet esse moram tempusque palestrae,
 12 quando hic Neptuni est filius, ille Jovis.

PUERPERIUM

C2_53 v.1 Haec ego formosa Lycidas pro conjuge vota
 2 persolvo et capiti myrtea sarta fero.
 3 Vos fetam servate precor, vos nocte silenti
 4 custodes vigili numine adeste Lares.
 5 Hic pilo, hic valida feriat contusa bipenni,
 6 deverrat celeri limina at ille manu.
 7 Tu procul in montes Silvane atque avia cedas
 8 improbe : culta hic sunt omnia, culta domus.

PRIMITIAE

C2_54 v.1 Et Pani et Cereri et Baccho dat rusticus Aegon
 2 primitias ruris munera parva sui :
 3 lac Pani, Cereri spicas Bacchoque racemos,
 4 ut vitem, ut segetes, ut tueantur oves.
 5 Quod si nec grando, mala nec rubigo luesque,
 6 nec fures poterunt, nec nocuisse lupi,
 7 debita tum vestras felix cadet hostia ad aras :
 8 Pani haedus, Cereri sus, tibi, Bacche, caper.

AD LAELIUM TORELLIUM

C2_55 v.1 Quem modo perscriptum Laeli legis optime librum,
 2 ultima suscepti cura laboris eram.
 3 In quo plus multo tibi me debere fatebor,
 4 quam, cujus nuper sum satus ingenio.
 5 Nam, ni illum de spe depulsum animoque jacentem
 6 erigeres, egomet non modo non poteram
 7 quicquam esse : ast id, quod miserum foret, ilicet omnes
 8 absumpsit fratres jam quoque flamma meos.

IN ALPHONSI ATESTINI FERRARIENSIVM DUCIS II
 ET LUCRETIAE MEDICIS COSMI F. NUPTIAS

C2_56 v.1 Exitium Europae miserati instare propinquum
 2 junxerunt dextras Arnus et Eridanus.
 3 Quod tantum in foedus nunc quis dubitare potest, quin
 4 pacati veniant et Tagus et Rhodanus ?
 5 Conjungent illi (inquam) animos hoc foedere : et una
 6 conjungent magnis flumina fluminibus.
 7 Gaude Ister, gaude Hebre, tibi jam vincula rumpent
 8 Arnus et Eridanus, et Tagus et Rhodanus.
 9 Tuque adeo Europa auspiciis felicibus aucta,
 10 conjugio huic laetum laeta precare Deum.

AD MUSAM

C2_57 v.1 Si nihil in nostris positum scis esse libellis,
 2 o, quae Parnassum blanda Thalia colis,
 3 quod non primores linguae dixisse Latinae
 4 constet, sive Maro, sive sit is Cicero,
 5 seu Carus, cultusve Terentius atque Catullus,
 6 et reliqui, quos tum pertulit illa viros
 7 heroum acta astris valde felicibus aetas,
 8 illa aetas virtutum omnium amica parens :
 9 da, si justa precor, quaecumque ita scribimus, esse
 10 aeterna et ferri docta per ora virum.
 11 Nosque tibi ante aram ponemus in igne quotannis,
 12 quos facit indoctus Cacula versiculos.

IN OBITUM IOANNIS MEDICIS CARDINALIS AD MARIUM COLUMNAM

C2_58 v.1 Nec lacrimas oculis, tristes nec pectore questus
 2 ullos in tanto funere, docte Mari,
 3 rupi ego. Sed subito stupefactus fulminis ictu,
 4 et cecidi et jaceo nunc quoque mutus humi.

IN EIUSDEM OBITUM AD EUNDEM

C2_59 v.1 Heroum qui facta Mari paulo ante parabam
 2 dicere et aeternis concelebrare modis,
 3 oppressus foeda hac caeli subitaque ruina
 4 ceu saxum in gelidis montibus obrigui.
 5 Elatusque eodem, quo maximus ille, feretro,
 6 maxima pars tanti funeris ipse fui.
 7 Et modo, qui loquor haec, vereor sim vivus, an hujus
 8 jamdudum extincti corporis umbra levis.

IN EIUSDEM OBITUM

C2_60 v.1 In magno patris imperio quam vixerit insons
 2 quamque incredibili religione pius,
 3 qui modo vix quarti ingressus vestigia lustris
 4 ltima Joannes flosculus orbis erat.
 5 Testantur gemitus passim lacrimaeque bonorum,
 6 inque ipso populi publicus ore dolor.
 7 Sed, cui vel Latium meminit, vel Etruria nusquam
 8 nec vidisse ullum, nec genuisse parem,
 9 flagitia ille hominum et scelera importuna perosus
 10 et misera innumeris saecula nominibus,
 11 debuit ad Superos tum primum atque astra reverti,
 12 cum reliquis vita haec gratior esse solet.

IN EIUSDEM OBITUM

C2_61 v.1 Non te tam pulchro spoliatum corpore tamque
 2 orbatum innumeris flemus abisse bonis
 3 Joanne : nam cui Superi non ulla negarunt
 4 dona, super caelum, quod peteretur, erat.
 5 Nos ipsos ipsi flemus, qui amisimus in te,
 6 quantum nulla umquam saecula restituant.
 7 O fragilem fortunam hominum ! Quam saepe repente
 8 in primo spatii limine lapsa ruit.

IN EIUSDEM OBITUM

C2_62 v.1 Quem Cosmus Medices unum quemque Helionora,
 2 magna Toletanae gloria honosque domus,
 3 innumeris ambo juvenem virtutibus auctum
 4 spem Latio fuerant se genuisse rati,
 5 occidit extinctus subito. Nos vivimus ? Inque hac,
 6 hac aliquid vita credimus esse boni ?

AD COSMUM MEDICEM MAGNUM DUCEM HETRURIAE

C2_63 v.1 Qui primum bene suscepta, Dux maxime, et inde
 2 tam pulchre educta prole beatus eras,
 3 amisti subito geminos, tua lumina, natos :
 4 terra quibus nusquam sustulit ulla pares.
 5 Oraque cum passim lacrimis manantia cernas,
 6 tu tamen immoto vultu animoque manes.
 7 Idque, quod in rebus jam te fecisse secundis
 8 constat, in adversis vis modo constet idem.
 9 O praestantem animum dignumque heroibus illis,
 10 unde tibi illustres dinumerantur avi.
 11 Sed quorsum haec ? (Eheu) nostra haec sunt vulnera : et isti
 12 non tibi, sed populis interiere tuis.

IN CACULAM

C2_64 v.1 Cacula tam placet ipse sibi, tam se ipse celebrat,
 2 quam, qui se magnis vatibus esse parem
 3 credit, quod tantum conscripto epigrammate, quemdam
 4 terruit e doctis conspicuisque viris,
 5 ne tractaret idem, quod jam tractaverat ipse,
 6 deplorans Pepuli funera acerba ducis,
 7 quem primae primo versantem in flore juventae,
 8 eximiisque auctum dotibus ingenii
 9 et praestantem armis et nobilitate potentem,
 10 improba mors campos misit ad Elysios
 11 ante diem, longam tam dignum vivere vitam,
 12 quam sunt istius carmina digna mori
 13 aeternisque tegi tenebris et nocte profunda,
 14 et mergi obscuris cuncta voraginibus.
 15 Quare Cacula se fallit. Nam, qui sua non vult
 16 conferri ipsius carmina carminibus,
 17 impuri metuit propter contagia versus,
 18 ne qua suis labes haereat in numeris,
 19 ac se postilla Parnassi e vertice sacro
 20 Musae furcillis praecipitem ejiciant.

IN EUMDEM

C2_65 v.1 Saepe mihi dubio versanti in pectore multa
 2 constitit ipsa sui nescia mens animi :
 3 an tot campivagi fluctus, cum Jupiter olim
 4 effusis terras obruit aequoribus,
 5 delerint homines ; an tot Phaethontius ignis,
 6 cum sata, cum silvas, cum maris ussit aquas ;
 7 quot, qui ceu funesta lues grassatur in omnes,
 8 ipse suis perimit Cacula versiculis.
 9 Ut, quid praecipue vita sit noxium in omni,
 10 ipse egomet sane quam sim animo ancipiti,
 11 sed tria sunt certe mala maxima : pontus et ignis
 12 quosque facit saevus Cacula versiculos.

IN EUMDEM

C2_66 v.1 In cycno quicumque leves, vel in ansere plumas,
 2 in torvo setas qui numerabit apro ;
 3 inque coma excultae crines undante puellae,
 4 ad teretes suras dum spatiosa fluit,
 5 mox levi collecta manu sinuatur in orbis,
 6 et multo nitidum vestit honore caput ;
 7 qui guttis quo vere pluit ; corpuscula qui quot
 8 grandinis in terras aethere lapsa cadunt ;
 9 qui, praeceps cum saevit hiems, quot prata pruinae
 10 urunt ; quot torpent stagna lacusque gelu,
 11 noverit ; et Libycus pelagi quot fluctibus Atlas
 12 tunditur ; et pontus monstra quot altus alit ;
 13 ille idem poterit turpissime Cacula mendas,
 14 carminis et labes enumerare tui.
 15 In quo nec verbis quicquam est impurius ipsis,
 16 quodque minus, quod vis, significare queat.
 17 Non res egregiae, non sensa, sed omnia plane
 18 e vulgi media faece petita rudis,
 19 omnia et illepida et numeris confusa Latinis,
 20 ruris et insulsis omnia plena jocis.
 21 Et tamen o Musis Phoeboque infense poetam,
 22 te ipse poetam inquam Cacula saeve vocas.

AD RANERIUM BOCCAM

C2_67 v.1 Qui cupis aeternum laudis praecerpere fructum
 2 et tenebras numquam mortis obire malas,
 3 virginibus da te Aoniis, quae flumina propter
 4 Permessi assidue carmina docta canunt.
 5 Sic tibi sublimi contingere vertice caelum
 6 et dabitur Divum nectare posse frui ;
 7 unde ipse immortale aevum jam nactus et exsors,
 8 nominis effugies funera acerba tui.
 9 O felicem igitur fortunatumque laborem,
 10 cujus ope a mortis lege solutus eas.

AD ALBIAM PUELLAM - ???

C2_68 v.1 Carminibus mihi si duram vis flectere mentem
 2 Albia, voce tua consocianda lyra est.
 3 Laetitias ego tum magnas jam sentio, cum mi
 4 liquida vox sensus et sonus exhilarat.

DE PHLOGILLA

C2_69 v.1 Dianae Phoeboque novum decus addita et ingens
 2 gloria Tyrrheni culta Phlogilla soli,
 3 audiit ut primum magnum rediisse Columnam
 4 incolumem ad ripas, Arne beate, tuas,
 5 laetitia exiliens : "Hoc est (ait) ilicet, hoc est,
 6 bruma quod hic vernas gignit alitque rosas."

DE DAMONE ET PHLOGILLA

C2_70 v.1 Damoni dum forte subit nova cura Phlogilla,
 2 Dianae et Phoebi grata Phlogilla choro :
 3 "Ne me (ait), o ingens honor et nova gloria Florae,
 4 sperne, quod obrepat cana senecta comis.
 5 Ipsae etiamnum doctae adhibent ad sacra sorores
 6 immiscetque suis me Cytherea choris.
 7 Quin ego, quod tecum licet admirere, Columnae
 8 gratus et in primis grata Thalia mea est.
 9 Ille meos versus magni facit, ille poetis
 10 me quoque doctiloquis adnumerare solet.
 11 Ille etiam, si quam canimus, fore censet, ut olim
 12 canescat saeculis innumerabilibus."

AD ALEXANDRUM PUCCIUM

C2_71 v.1 Venor ego, o Pucci, et venandi captus amore
 2 persequor assidue per nemus omne feras.
 3 Nec piget horrentes indagine cingere saltus
 4 et cava sollicitas ducere ad antra canes.
 5 Ac, licet interdum frustrentur inania venti
 6 vota, neque in casses praeda petita cadat,
 7 dum tamen eliciam, quae tu mihi carmina nuper
 8 misisti, Ismaria carmina digna lyra,
 9 certe usquam non ullus erit, qui dicat inanem
 10 venatu e tanto me rediisse domum.

AD CYPRIANUM SARACINELLIUM

C2_72 v.1 Difficile est, Cypriane, illum, quem diligis ipse,
 2 odisse atque inter non numerare bonos.
 3 Ut me, perpetuo quem tu dignatus amore es,
 4 esse putem dignum, quem bonus omnis amet.
 5 Et certe, cunctis qui se cupit usque probari,
 6 ille uni totum se probet ante tibi.

AD HIERONYMAM ARAGONIAM

C2_73 v.1 Nec cantu tibi Sirenes Hieronyma certent,
 2 nec tibi se forma praeferat ipsa Venus.
 3 Nam, tu dum celeri percurris pollice chordas
 4 summaque clarisona sidera voce feris,
 5 horrida deponunt rapidi sua murmura venti
 6 et sistunt cursus flumina praecipites.
 7 In quem autem dulces ridens convertis ocellos,
 8 efficitur gelidus protinus ille lapis.

DE LAELI TORELLI CARMINE

C2_74 v.1 Cum Laeli Angelius legisset amabile carmen,
 2 admirans tales edidit ore sonos :

3 Si juris legumque unus doctissimus hic est,
 4 qui pote Castalios sic coluisse choros ?
 5 Quod si tam doctos didicit conscribere versus,
 6 primum in iudiciis obtinet unde locum ?
 7 Sed, cuius voluit fidei committere Cosmus
 8 totius imperii sceptrum regenda sui,
 9 non modo consilio reliquis praestare decebat,
 10 verum aliis etiam dotibus ingenii.
 11 Afflueret quo laeta bonis Etruria cunctis,
 12 et Cosmi aeternum nomen in orbe foret.

AD FRANCISCUM MEDICEM ET IOANNAM AUSTRIACAM MAGNOS PRINCIPES HETRURIAE

C2_75 v.1 Innumeras alii statuas dum ponere vobis,
 2 ornare et pictis compita imaginibus
 3 fornicibusque vias properant conjungere, qui ab se
 4 fortia vestrorum facta patrum memorent ;
 5 ipse ego, vos inter sanctos quod cantet amores,
 6 quod celebret fausti gaudia conjugii,
 7 conscripsi, o regum gratissima germina, carmen,
 8 et medio veniens ex Helicone tuli.
 9 Vos animis capite id laetis. Nam laeta canenti
 10 omina, vos laeta fronte favere decet.

LIBER TERTIUS

AD IOANNEM MEDICEM COSMI MAGNI DUCIS HETRURIAE F.

C3_1 v.1 Cosmi progenies incluta maximi,
 2 Joannes, decus et gloria Etruriae,
 3 in te quid celebret nostra potissimum
 4 anceps si dubitat Musa, nec invenit,
 5 quem finem statuatur, quave ab origine
 6 primum exorsa canat tot bona, quae tibi
 7 concordiam tribuunt numine caelites ;
 8 Quid mirum ? Veterum namque se imagines,
 9 unde ortum repetis, protinus offerunt :
 10 queis se supra alios Tuscia sustulit
 11 ad caelum et tetigit sidera vertice.
 12 Mox fratres animum ad se rapiunt tui :
 13 quorum qui poterit dicere regias
 14 laudes, idem etiam quot mare fluctibus
 15 pertundat Zephyris litora flantibus
 16 atque aether rigidis quot micet ignibus
 17 percensere queat, dum patet undique.
 18 Sed quorsum haec ? Quoniam non tua ducis haec,

19 quae non prestiteris tutemet, et labor
 20 in queis non aliquis se tuus efferat,
 21 laudari meritis possit uti suis.
 22 Ergo non ego te, flos juvenum, canam,
 23 quod forma egregii corporis atque opes
 24 et praestans veteris nobilitas domus
 25 reddant conspicuum, sed quod amabilis
 26 cunctis, das operam, nullus ut uspiam
 27 virtute anteeat, sive agiles equi
 28 armos collibuit frangere Thessali,
 29 seu torquere lacertis jaculum in feras,
 30 tractare aut manibus tela decentibus,
 31 aut nando tumidi fluminis alveum
 32 tranare et rapidis vincere cursibus
 33 Eurique et Boreae flamina praepetis.
 34 Atque haec forte aliquem si moveant parum,
 35 id certe moveat, quod potis abdere
 36 cum te in deliciarum illecebras fores,
 37 fortunae pariunt quas bona divitis,
 38 doctrinae in studiis pervigilaveris,
 39 Musis et Clario gratus Apollini :
 40 sese munierit nullus ut artibus,
 41 dignis ingenuo pectore, pluribus.
 42 Quare si mea, nunc quae tibi mittere
 43 ausus sum, veluti culta probaveris
 44 ipse unus, videar posse, beatus ut,
 45 monstrari digito praetereuntium.

AD FRANCISCUM TOLETUM SOCIETATIS IESU

C3_2 v.1 Pater Tolete, cujus admirabilis
 2 rerum omnium scientia
 3 vitaeque purae et absque labe sanctitas
 4 convertit in se totius
 5 aetatis oculos hujus, ut quod valdius
 6 seorsum stupescant singuli
 7 simulque cuncti prorsus esse nil putent
 8 unaque voce praedicent.
 9 Nam nullus usquam vivit integerrimus,
 10 qui te sibi non praeferat,
 11 tuaeque comparatus innocentiae
 12 sese nocentem non vocet,
 13 libensque fassus id, quod est, vestigiis
 14 si rite inhaeserit tuis,
 15 non se beatum praeter omnes autumet
 16 speretque postmodum fore,
 17 ut mentium caelestium patri Deo
 18 acceptior deserviat,
 19 vitamque felix degat unus undique
 20 bonis refertam maximis.
 21 Nam quid necesse nunc referre pluribus,
 22 o lux Iberae gloriae,
 23 doctorum ut omnis ordo te praestantibus
 24 ad astra laudibus ferat ?
 25 Ut tu tenebras intimas discussseris
 26 tuis libellis aureis

27 tota ex Lycei porticu ? In queis se diu
 28 inambulantes volucrant ?
 29 Ut ipsa Patrum scripta, quae divinitus
 30 dictavit ollis Spiritus
 31 superne missus, ipse sic illuxeris,
 32 ut Phoebus illucet diem ?
 33 Quid ? Cum remissis hinc et hinc, ut assolet,
 34 curis severioribus,
 35 Musas revisis, non ne dulci carmine,
 36 quod pangis, omnes praeteris,
 37 quotcumque nostra protulere saecula
 38 aequasque te prioribus ?
 39 Quid ? Cum diserte disputas de feriis
 40 et maximis negotiis
 41 statuque rerum publicarum, regibus
 42 consultatus a potentibus ?
 43 Eventa cuncta, cuncta, quae putaveris
 44 agenda, non vel Delphici
 45 sunt certiora oraculis Apollinis ?
 46 Quo tempore illa credidit
 47 aetas dari mortalibus certissima,
 48 nec fas haberi non rata ?
 49 Ut jure te mirentur omnes omnium
 50 mortalium decuriae
 51 colantque tamquam heroa quemdam maximum,
 52 et numen in terris novum.
 53 Quos inter et me forte si locaveris
 54 benignus, o, quas gratias
 55 agam Parenti caelitum, qui me reum
 56 hujusce voti fecerit ?

AD BONAM VALETUDINEM PRO GEORGIO CORNELIO

C3_3 v.1 O Diva, sedes quae colis arduas
 2 semperque laetis caelicolum interes
 3 mensis et indulgens choreis
 4 esse jubes procul usque curas :
 5 sic te pavores undique, sic fames
 6 tristesque morbi, sic macies malas
 7 depulsa vitet sub tenebras
 8 inque nigro dominetur Orco,
 9 risusque blandi pepetuis comes
 10 adsit vicissim lusus et aureae
 11 cum Gratiis Horae ac perennis
 12 laetitiae Venus alma mater,
 13 mater pudici sancta Cupidinis
 14 altrixque castae grata licentiae :
 15 cui ventus atrox sic jubenti et
 16 saeva maris cadit unda saxis,
 17 saevi quiescunt turbinis impetus,
 18 nubes relinquunt aethera, nec sola
 19 terrae salubri jam madescunt
 20 rore nisi Zephyrisque flabris ;
 21 tum se virenti gramine pascua
 22 vernisque passim floribus induunt,
 23 tum dia vitae dux beatae

24 corda per insinuat voluptas.
 25 Nam quae sit auri te sine divitis ?
 26 Quae liberorum gratia ? Quae imperii
 27 late patentis, quaeve curae,
 28 quaeve mali requies laboris ?
 29 Redde o precamur te bona supplices
 30 hic quicquid usquam est et juvenum et senum,
 31 redde o merenti, nec priorem
 32 invidias juveni salutem,
 33 pro quo Adriani litora marmoris
 34 atque ora Tusci nobilis aequoris
 35 suspendit altis vota Divis,
 36 nec modus aut gemitu aut querelis
 37 ponetur ullus tristibus antea,
 38 quam saevientem depuleris luem,
 39 votique nostri nos precisque
 40 feceris adveniens potentes.
 41 Tu sola fletum sistere, tu potes
 42 nobis dolorem hunc demere maximum ;
 43 et dignus ille est quem revisas
 44 protinus incolumemque serves.
 45 Nam sempiternas nec reverentior
 46 mentes honorat, nec melior colit,
 47 integritatis nec perinde
 48 ullus amans fideique certae
 49 custos, et asper sontibus et ferox
 50 atque innocenti commodus exstitit,
 51 virtutis invictus satelles
 52 et scelerum metuendus ultor.

AD ALFONSUM CARAFAM CARDINALEM

C3_4 v.1 Nec, quam sollicitus tum mihi fregerit
 2 omnem sensum animi, quamve gravis dolor
 3 mi sese extulerit pectore in intimo,
 4 cum te Fors mala perculit,
 5 ullus, sit licet et doctus et eloquens
 6 hibernisque fluat plenior amnibus,
 7 urna cum pluvias fundit Aquarius,
 8 dicendo facile explicet.
 9 Nec rursus o columen Parthenopes novum,
 10 o spes Italiae fida labantis in
 11 pejus quotidie, o gloria saeculi et
 12 virtutum decus omnium,
 13 Alfonse : ipse equidem nunc ego, dulcia
 14 quamquam Sithoniae more nivis cadant
 15 jam verba e mediis visceribus mihi,
 16 unquam sim potis assequi,
 17 quantum laetitiae pectore ceperim,
 18 cum tot post hiemes atraque tempora,
 19 quorum vi misere jam nimium diu
 20 conflictatus es innocens,
 21 discussis tenebris candidior tibi
 22 illuxisse dies denique visus est,
 23 multis ille quidem gratus, at hercule
 24 mi gratissimus, unice

25 qui te, qui veteres gentis imagines
 26 et fastos memores actaque tot domus
 27 non uno veneror nomine, qui tuas
 28 virtutes colo proprias.
 29 Ergo o perpetuus affici honoribus,
 30 et cultu juvenis digne superstite,
 31 istanc ex animo nunc ego gratulor
 32 fortunam tibi prosperam.
 33 Et cunctos veniens laetior in dies
 34 rebus se facilem praebeat ut tuis
 35 sic opto et cupio, nil sit ut in meis
 36 votis, quod magis expetam.

AD SE IPSUM

C3_5 v.1 Quis hoc futurum credidisset Angeli ?
 2 Amicus ille, plurimum qui se tibi
 3 debere norat idque fassus antea
 4 in amore tete praefererebat omnibus,
 5 tui suique factus immemor modo
 6 oblivioni teque seque una dedit.
 7 Quis hoc futurum credidisset Angeli ?

IN FEDERICI FELTRII URBINATIUM DUCIS EFFIGIEM

C3_6 v.1 Artes si docuit Punica gens suas
 2 captantem insidiis Hannibalem duces,
 3 si praestante Philippus
 4 fudit consilio hostium
 5 invictas acies, si sapientia
 6 Sertori potuit bellica caedibus
 7 non unis legiones
 8 affecisse Quiritium :
 9 ingenti quoque te Sfortia gens suo
 10 astu consilioque et sapientia
 11 instructum bone Feltri
 12 bellis extulit horridis.
 13 Sic casus similes, quos tibi bellicus
 14 orbatos oculo fecerat altero,
 15 virtus ipsa coegit
 16 invitos quoque cedere.
 17 Cui praeter decora haec maxima, maximas
 18 grates Aonidum docta cohors refert,
 19 culti et ripa Metauri
 20 et fluxu Tiberis rapax.
 21 Dum terras igitur conteget undique
 22 caelum, cum Latio Graecia nobili,
 23 quod vivit tibi semper
 24 se debere fatebitur.

AD BENEDICTUM VARCHIUM, IN OBITUM LUCAE MARTINI

C3_7 v.1 Quales aereo e vertice montium
 2 amnes primum humili flumine defluunt

3 radicesque suis imbribus arborum
 4 imas suaviter irrigant,
 5 ac mox propositum dum peragunt iter,
 6 paulatim innumeris fontibus alveum
 7 aucti, praecipites jam magis ac magis
 8 quercus funditus eruunt.
 9 Qualisve Ismarius Thracia ab ultima
 10 primum flat Boreas lenis et aequoris
 11 undae raucisono murmure perstrepunt
 12 ad primi vada litoris ;
 13 major dein hiemem concitat horridam
 14 incumbens pelago, nec prius impetum
 15 aurarum cohibet dura minantium,
 16 quam secum omnia verterit,
 17 quassasque ad scopulos impulerit rates
 18 saevo circumagens vortice turbinis
 19 Syrtesque in medias urserit et rapax
 20 alto cinxerit aggere.
 21 Varchi, sic lacrimas fundere suevimus,
 22 sic lenes gemitus, sic querimonias,
 23 si quid, quod miseri nolumus, accidit,
 24 sic suspiria primulum
 25 non alte petimus ; postmodo quae suas
 26 vires concipiunt non secus ac leves
 27 scintillae silicis fomite in arido
 28 sensim incendia suscitant.
 29 Luctum luctus alit, quando aditum semel
 30 maerori penitus qui patefecerit,
 31 in maerore jacet perpetuo et malam
 32 auget tristitiam in dies,
 33 donec fractum animum sollicitudine
 34 victor praesidiis dejicit omnibus,
 35 nec se praeterea perditus erigit,
 36 nec carus moritur suis.
 37 Ergo mollitiem hanc protinus abjice
 38 et finem numeris flebilioribus
 39 tandem impone. Tuos maestus ab aethere
 40 summo percipit auribus
 41 questus et lacrimas damnat amabiles,
 42 laetus Pierio qui prius audiit
 43 voces dulciloquas saepius et modos,
 44 quos cantu dare sueveras ;
 45 atque odit querulae carmina tibiae,
 46 postquam in perpetuam lumina condidit
 47 noctem ille ingenii cultor et omnium
 48 virtutum specimen, tuus
 49 Martinus, probitas cui parit et fides
 50 immortale decus, nomen et inclytum,
 51 quod nullo intereat tempore, dum poli
 52 pascent sidera vertices.

AD ARNUM AMNEM

C3_8 v.1 Pater beate fluminum liquentium,
 2 quotcumque Etruriam rigant,
 3 jugique fluxu dissecant Tuscos agros

4 pulsantque Tyrrhenum mare,
 5 nunc defludenti tardiores agmine,
 6 nunc acriores impetu :
 7 vale Arne multi et pervetusti nominis,
 8 quod nulla mutavit dies
 9 umquam, nec ulla barbarorum incursio,
 10 nec vis iniqui sideris.
 11 Seu te laboriosus olim filius
 12 Jovis tonantis, ardua
 13 cum Faesularum condidisset moenia
 14 reversus orbe ab ultimo,
 15 sic nuncupavit, mutuatus nomen id
 16 Arne ab sua Beotiae ;
 17 seu tu vocatus sic fuisti ab incolis,
 18 quos ipsamet produxerat
 19 Etrusca tellus quosque in ipsis finibus
 20 tibi educari videras :
 21 nam quod colonos esse credant Lydios
 22 docti putarunt fabulas.
 23 Sed tu vel hic, vel ille malis dicier
 24 Etruscus an Beotius,
 25 an Lydus altae clara proles Omphales,
 26 ceu fama fert, et Atyos :
 27 vale beate fluminum pater, vale.
 28 Hibernus et te Jupiter
 29 fecundet imbres sic, ut ire jam queas
 30 uni tibi simillimus,
 31 utrimque ripas inter altas dum fluis
 32 aptis onustus alveis
 33 hucusque merces convehentibus suas,
 34 quae post in urbe veneant.
 35 Vale Arne nunc. Salvere mox te jussero,
 36 Pater beate fluminum,
 37 cum litterarum conticentibus scholis
 38 revertar huc celerrimus.
 39 Me namque soles inter ardentissimos,
 40 quibus perusta exaruit
 41 Etrusca tellus omnis et frigentium
 42 aquae perennes fontium,
 43 refrigerasti temperatis fluxibus
 44 salubribusque balneis.
 45 Ergo o beate fluminum pater vale,
 46 rursusque cum revenerit
 47 aestas, calores vix ferentem me bono
 48 refrigerato flumine.

IN HORTUM

C3_9 v.1 Horte et vepretis tristior densissimis
 2 palustribusque uliginosior locis.
 3 In quo colendo, ni patrum vana est fides,
 4 versatus olim est Insuberque villicus,
 5 nec non Etruscus et malo assuetus Ligur
 6 diu : neque omnino aliquid ullus extudit.
 7 Cum reddidissent ante valde fertiles
 8 quoscumque fecundo irrigarant flumine,

9 festiva ut illi copia posthac sua
 10 civesque recreaverint et hospites,
 11 umbrisque soles frigidis defenderint.
 12 At tu vepretis tristior densissimis,
 13 expensa cui feruntur annis singulis
 14 (quis hoc putaret ?) ipsa tota millia
 15 triginta et amplius, peritque ceteris
 16 agris feracibus, neque ipsius manu
 17 heri sat umquam liberaliter satis
 18 in te colendo quicquid insumi solet.
 19 Cur non pruinis ustus et caloribus
 20 saevae miser Caniculae, jam desinis
 21 et nos et ipsos enecare villicos
 22 betisque malvisque et cicutis ? O precor
 23 aresce nobis horte : jam nimis diu
 24 moraris ; aresce horte nobis et sinas
 25 feraciores excoli Pisis agros.

DE BELLICIS LAUDIBUS HYAPPINI VITELLII

C3_10 v.1 Maximi Clio soboles Tonantis,
 2 dulcis o Phoebi soror, o perennis
 3 caeli et astrorum requies, virumque
 4 juge levamen,
 5 Musa, quae numquam sinis interire
 6 nomen heroum, tenebrisque et Orco
 7 vindicans, fortes hominum caduco
 8 eximis aevo :
 9 huc ades, si te numeris canenti
 10 bellicas laudes juvat affuisse ;
 11 huc ades, dum nos celebramus acris
 12 facta Vitelli.
 13 Hostibus quam sit metuenda virtus,
 14 orta quae patrum semel e triumphis
 15 posteris deinde est comitata cunctos
 16 mille per annos,
 17 testis est nostris male fida rebus
 18 Cyrnos haud una labefacta clade,
 19 cum jugum presso vetus exuisset
 20 libera collo.
 21 Quaeque suscepto temere impedivit
 22 Sena se bello minus auspicato,
 23 Tusca ubi effuso maduit recenti
 24 terra cruore
 25 saepe et audaces cecidere Galli
 26 non semel victi, nec acerba passi
 27 una, sed crebro cumulata latis
 28 funera campis.
 29 Testis et priscae spatiosa Cossae,
 30 nota quae saevo nimis ora Mauro
 31 suspicit muris geminisque tutam
 32 arcibus Ilvam.
 33 Quippe Turcarum refluens natavit
 34 sanguine, et sagittiferos maniplos
 35 vidit infractos Italiam dedisse
 36 terga manusque.

37 Venerat jussu Scythici tyranni
 38 nostra praedatum numerosa classis
 39 litora, et Tusci maris obsidebat
 40 aequor et oram.
 41 Illa non molles Arabas Syrosve,
 42 non parum fortes Lycios vehebat,
 43 sed truces Dacos et amica Marti
 44 pectora Bessos.
 45 Quin et immites aderant Geloni
 46 pellibus tecti caput, et ferentes
 47 Gnoossias tergo pharetras et acres
 48 Paeones arcu.
 49 Nec suas non et Cilicum catervae
 50 junxerant una validas bipennes,
 51 laeva quos armat clipeo latusque
 52 cingitur ense.
 53 Hos metu plenus Ligur atque Etruscus
 54 finibus pulsus patriis dolebant
 55 arduas passim populare sedes
 56 templaque Divum.
 57 Dumque nutricis vel adhuc egentes
 58 liberos a se procul ire captos,
 59 duci et uxores miseraque vincitas
 60 compede matres
 61 triste plorarent, aciem superbus
 62 litore in primo maris instruebat
 63 hostis, ut Tuscas ferus inter urbes
 64 castra locaret.
 65 Tunc Hyappini memoranda virtus :
 66 "Ecquis o mecum generosa pubes
 67 primus huc audax ? (ait) et paratum
 68 vadit in hostem ?
 69 Partus hic nobis hodie triumphus,
 70 et decus, quantum patribusque avisque
 71 facta quos clarant sua, comparasse
 72 nulla feruntur
 73 saecula". His dictis metuendus hasta
 74 evolat, qualis Jovis imminente ab
 75 rupe Massylos ruit in dracones
 76 fulva satelles.
 77 Primus et densas aperit cohortes
 78 vi, minis, ferro ; peditesque et ipsos
 79 principes leto dat, et obstinatos
 80 fundit agitque.
 81 Nec manus pugna prius abstinere
 82 doctus, hostilem periisse quam rem
 83 sentiat victor, tepefecit alta
 84 litora caede.
 85 Tunc humi fortes cecidere Daci,
 86 Paeones, Bessi, Cilices, Geloni.
 87 Tum suo primum didicit periculo
 88 barbara classis
 89 dextra quid possit, quid avita virtus
 90 Ausonum tanto duce : dum relictas
 91 parte majori sociisque longe
 92 fugit inultis.

AD ANTONIUM CIOFIUM IURECONSULTUM

C3_11 v.1 Feruntur olim tres fuisse virgines
 2 Thaumante natae, queis voracius nihil
 3 aetas parentum vidit, aut rapacius.
 4 Testatur hoc vel oris horror asperi,
 5 manusque obuncae, venter et profundior,
 6 quam Scylla, quam Charybdis ulla immanior.
 7 Quarum Celeno, quam vocamus, principem
 8 locum tenere creditur, sed alterum
 9 furens Aello, tertium rapax soror,
 10 nomen volatus cui celerrimus dedit.
 11 Hae regis olim Thracis haud mensas modo
 12 cibus onustas inquinabant fetidae,
 13 sed in profunda deprimebant viscera
 14 quaecumque promus condus extulerat penu,
 15 opes ut omnes devorarent imperi
 16 fameque cunctos enecarent Bistonas.
 17 Sed ut priora saecula haud inaniter
 18 tibi locuta forte persuadeas,
 19 quid has sorores ipse credam, percipe.
 20 Fuere tres tum iudices, quos litibus
 21 dijudicandis ille rex praefecerat,
 22 libidinose et insolenter improbi.
 23 Hi jus quod ipsum vendiderunt omnibus,
 24 nefasque miscuere fasque saepius,
 25 contentiones excitarunt plurimas ;
 26 regemque mentis lumine orbatum suae
 27 simulque falsos virginum vultu Scythas
 28 ad indigentiam impulere hujusmodi,
 29 ut quod comesset, haud haberet quispiam ;
 30 donec fugatos Zetus et Calais procul
 31 Plotas relegant ultimas in insulas.
 32 Illic rapaces in volucres Jupiter
 33 iratus omnes vertit et jussit suas
 34 canes vocari sic, ut ipsae sumerent
 35 modesta, cum liberet, ora iudicum
 36 variisque poenas irrogarent gentibus,
 37 quo jure, quave injuria. Sic plurimi
 38 fuere ab istis perditum, ceu perditum
 39 nunc nos ab iisdem perdimur : nec profuit
 40 quod tu Ciofi docte quodque ceperint
 41 paterque filiusque me suam in fidem
 42 Asinii, clientum fida spes, quod aequior
 43 usquam sit acta nulla causa gentium,
 44 quod vestra praestet omnibus scientia,
 45 qui sunt, vel olim qui fuere maxima,
 46 terrarum ut orbis novit, advocatio.
 47 Scitum ergo id est, quod dicitur : plus unius
 48 apud rapaces posse summam gratiam
 49 pecuniamque, jura quam civilia,
 50 rem si probandam luce monstrent clarius.

AD TIPPULAM MEDICUM

C3_12 v.1 Nil esse certum credidere nonnullae
 2 scholae, quod ulli percipi putent posse.
 3 Nam saepe quisque decipi suos sensus
 4 sentit videtque. Nempe in omnibus remi
 5 existimantur esse prorsus inflexi,
 6 imas in undas cum trireme de summa
 7 pendent remissi. Nec minus columbarum
 8 circum refulget aureis nitens plumis
 9 coloribusque plurimis litum collum
 10 in sole dum versatur. Et tamen falsum est
 11 et hoc et illud. Namque nec recurvantur
 12 remi, nec auro nec coloribus fulget
 13 collum columbae, quod videtur, in multis.
 14 Nil ergo certum scire possumus quicquam,
 15 si veritatis nuntii ministrique
 16 falluntur ipsi saepe principes sensus ?
 17 Haec disputantum somnia et meras nugas
 18 ostendit esse nuper ille, quem dicunt
 19 et apte et eleganter inter aequales
 20 saltare consuevisse, et inde cognomen
 21 tulisse saltatoris, in scholis donec
 22 est Adrianis commoratus ; artisque
 23 (quis tunc futurum credidisset hoc umquam ?)
 24 Gnarus sciensque nullius bonae, nunc se
 25 gnarum medendi venditat malo plane
 26 cum damno Etruscae civitatis, et gentis
 27 certus peremptor carnifexque crudelis.
 28 Ille ergo saevus, ille scilicet tortor
 29 ostendit unum posse scire nos certum :
 30 omnes perisse, queis medetur, aegrotos.

AD FERDINANDUM MEDICEM CARDINALEM

C3_13 v.1 Darius olim Xerxis illius pater,
 2 quem navigasse Thessalos montes ferunt
 3 et ambulasse Thraciam Propontidem,
 4 cum forte mirae granditatis Punicum
 5 malum patefecisset, unde plurima
 6 apparuere grana mirum in ordinem
 7 digesta ciccos inter et membranulas ;
 8 interrogatus, ane tot carbunculos
 9 habere vellet masculos, an quidpiam
 10 aliud, quod esset carius carbunculis
 11 cunctisque gemmis Indici maris : "Equidem
 12 (respondit ille) si optio haec detur mihi,
 13 non regna, non elegerim pecuniae,
 14 aurive possidere tot praedivitis
 15 venasque thesaurosque, sed tot Zopyros,
 16 fidos amicos scilicet." Ceu diceret
 17 se malle Cosmus ille, qui tuus est pater,
 18 habere, quam tot regna, tot Torellios.

AD MARIUM COLUMNAM

C3_14 v.1 Olim volucres, cum solebant a metu
 2 nos inter ire liberae
 3 formidinisque prorsus expertes malae
 4 habere sic commercia,
 5 ut interessent omnium celebribus
 6 mortalium conventibus,
 7 coorta derepente tristis exstitit
 8 rerum omnium penuria.
 9 In qua misellis cum nihil plane foret,
 10 quo pellerent diram famem,
 11 essentque terris clausa cunctis horrea
 12 agrique contecti nive,
 13 in contionem prodiere, quomodum
 14 rebus pararent perditis.
 15 Ibique dictis commodum sententiis,
 16 in hanc itum est ab omnibus :
 17 uti volucres singulae pennas sibi
 18 alis ab ipsis vellerent,
 19 et inde vestem texerent multiplicem.
 20 Quae, cum coloribus foret
 21 distincta pulchris, illico potentibus
 22 venumdaretur regibus ;
 23 ac mox coacta publice pecunia
 24 emptis redirent frugibus.
 25 Id ergo tota ut approbavit contio,
 26 pennas volucres vellere,
 27 quas inter omnes ducerent pulcherrimas,
 28 unumque conferre in locum.
 29 Dehinc, beatæ veste confecta, suas
 30 quaeque aestimare plurimi
 31 sibique soli plaudere, asserens fore,
 32 ut vestis ob suas modo
 33 pennas placeret utque earum nomine
 34 divenderetur optime.
 35 Primumque res successit haud multo secus,
 36 atque antea putaverant.
 37 Sed mox, ut illas alteras pennas semel
 38 pennae voraces alitis,
 39 quae saevientis est ministra fulminis,
 40 mixtas vorarunt (et quidem,
 41 ut fabulantur, indidit vim Jupiter
 42 cum primum ab Idae vallibus
 43 tulere regis filium) sed ut tamen
 44 pennas vorarunt ceteras,
 45 contempta vestis ipsa, despiciatui est
 46 pictura ducta textilis.
 47 At rursus illae, nesciae videlicet
 48 quid accidisset, alteram,
 49 quaestus lucrique spe futuri, credulae
 50 cum mox venirent venditum
 51 secumque mirarentur esse neminem,
 52 qui vel levem pecuniam
 53 ibi occupare vellet, haec petentibus
 54 silentii causam novi,

55 respondit ipsis unus ex emptoribus :
 56 "Abite fallaces aves,
 57 vobisque habete vestra mercimonia
 58 unaque pennas putridas.
 59 Quod si quid exportare posthac forsitan
 60 ex hisce vultis nundinis,
 61 pennis reversae ferte textam stragulam,
 62 quae permanere in posterum,
 63 aliis cito pereuntibus pennis, diu
 64 superstites ipsae solent."
 65 Sic nos Columna debitas poenas tibi,
 66 Phoebi Columna maximum
 67 decus, luemus e disertorum choro
 68 coetuque rejecti : tuis
 69 qui perpolitus forte nostros junximus
 70 cum versibus versus malos,
 71 minuta vatium turba. Nec, fastidio
 72 pro nostro et insolentia,
 73 (o, non ferendam tempore ullo audaciam
 74 poenaeque plectendam gravi)
 75 vim sustinere posse desperavimus,
 76 Mari, tuorum carminum ;
 77 vim, quae perinde nostra devoraverit
 78 attriveritque carmina
 79 paucis diebus, ut vorari palumbae
 80 et atteri laminae solent,
 81 quas, forte lima dum secantur, ilicet
 82 evanuisse cernimus.

AD M. TULLIUM BEROIUM

C3_15 v.1 Quicumque veram te quietem persequi,
 2 diserte Beroi, putat,
 3 unumque te miratus, uno in te stupet,
 4 haud errat is, me iudice.
 5 Neque hercle dico hoc ipse, quod parentibus
 6 virtute claris, et loco,
 7 et civitate pervetusta sis satus ;
 8 divesque opibus et copiis
 9 tuae beatus incolas sedes domus,
 10 solumque dulce patriae,
 11 felicitatis plurimum tibi haec licet
 12 afferre non ulli negent ;
 13 sed quod subacti dotibus pulcherrimis
 14 ornatus ingenii colis
 15 Musas ab urbe procul et ab negotiis
 16 vitae molestioribus ;
 17 canisque laetus fertilis ruris bona,
 18 et quae sequatur singulas
 19 horas voluptas, quoque fallamus modo,
 20 si nos quid urit turbidos.
 21 Nec, Vere cum soluta nix Favoniis
 22 lapsus adauget fluminum,
 23 non dicis, almae vitis ut propagines
 24 tenerrimique palmites
 25 superne gemmas turgidas trudent suas,

26 ut induant silvae comas,
 27 arbusta florem, molle gramen pascua,
 28 quod mox petulcae tondeant
 29 morsu capellae, dum per asperos vepres
 30 lascivientes gestiunt ;
 31 ut rore dulci, ut uvidis herbis oves
 32 pastae revertantur domum,
 33 agnisque, clausos mane quos reliquerant,
 34 distenta portent ubera.
 35 Quin pertinaces addis, ut cantus die
 36 noctuque Aedon integret,
 37 dum voce rura, voce mulcet aethera,
 38 totumque jam flammis dolet
 39 novis peruri pectus et medullulas
 40 amoris aestu liquier.
 41 Quos haurientes auribus questus, vagas
 42 ducunt choreas cum suis
 43 mixtae puellae amantibus sub ilice
 44 densa, vel ulmo sub cava,
 45 afflantque passim mutuae mentem omnium
 46 et ossa pervadunt faces :
 47 faces jugalis illices Cupidinis
 48 castoque amori praeviae.
 49 Quid ? Quae canenti praestat uni non iners
 50 aestas tibi solacia ?
 51 Sive arva aduncae dentibus falcis metis,
 52 seu tu maniplos alligas,
 53 spicisve grana discutis flaventibus,
 54 alteve jacta ventilas ;
 55 seu cum meridiatus exis vespere
 56 et aspicias laetos greges
 57 cubare villae limen ad notum suae
 58 ervoque praepingues boves ;
 59 vel cum celebras luce festa ludicrum
 60 in gratiam viciniae,
 61 solvisque dulce praemium victoribus,
 62 quod quisque se dignum ferat ;
 63 atque inde cum se torridus fregit calor,
 64 aut amne proximo lavis,
 65 lymphaque temperata te refrigeras
 66 salubribusque balneis ;
 67 aut conticentem suscitans musam lyra,
 68 fidesque contentas moves
 69 nervisque molle carmen aptas, suaviter
 70 quod accinant puellulae.
 71 Jam vero ad illas quisquis oculos verterit
 72 suos, tibi quas exhibet
 73 autumnus uvas vite ab alta pendulas,
 74 et poma, quae carpas manu,
 75 fervensque mustum, quod cavo exceptum lacu
 76 pressos reponas in cados ;
 77 quisquis per agros et vepreta viderit
 78 urgere te semel feras
 79 atque impedire retibus densissimis
 80 viscoque deceptas aves,
 81 vere beatum, Marce Tulli, te putet,
 82 his qui fruare commodis

83 et ruri et ipsa in urbe, dum complecteris
 84 vitae latentis singulas
 85 laudes venusto persecutus carmine,
 86 quod in futurum dulcibus
 87 Nymphis dicatum (si qua vatibus fides)
 88 non ulla delebit dies.

LIBER QUARTUS

AD LAELIUM TORELLIUM

C4_1 v.1 Ut omnis tibi constet et negotii
 2 atque otii ratio, Torelle, nostri,
 3 ad te mittimus hunc novum libellum ;
 4 novum : nam mihi nuper inchoatum
 5 Saturnalibus hisce ad umbilicum
 6 duxere Aonides novem sorores,
 7 Pisis dum scola conticescit omnis,
 8 dum frigent studia ipsa litterarum
 9 prolata et cupide nimis juvenus
 10 damnosus vacat occupata ludo.
 11 Hunc tu (si modo, qui legatur, esse
 12 dignum duxeris) oro diligenter
 13 totum perlege et aestimato tecum
 14 quam sint ingenio poetae inani :
 15 quibus cum pereant sui labores,
 16 non possunt tamen abstinere, quin se
 17 eodem loci identidem revolvant.
 18 Quamquam, quicquid id est, tuo absolutum
 19 hortatu sciet esse posterorum
 20 aetas. Namque ego sublevata nulla
 21 non spe, non ope, jusseram valere
 22 Musae carmina nostrae. At unus ipse,
 23 ipse inquam acriter increpans ad illam
 24 curam (pro quo etiam tibi patrone
 25 gratias ago) rursus impulisti.
 26 Ergo quod novus exeat libellus,
 27 et quod consilium meum perenne
 28 tacendi haud tuear, diserte Laeli,
 29 (haec si unquam mea forsitan videbunt
 30 plus uno superesse grata saeculo)
 31 acceptum referent tibi nepotes.

AD FRANCISCUM BENCIUM SOCIETATIS IESU

C4_2 v.1 Benci, dum numeris Maronianis
 2 tuorum socium migrationes
 3 ad sedes canis aetheris quietas
 4 et docte, et pie, et eleganter, ut qui
 5 legerit semel hauseritque, quanta
 6 voluntate animi hostibus necandos
 7 ipsi se obtulerint, et impiorum
 8 pii diruerint sacella et aras,
 9 et cruces ibi fixerint colendas,
 10 statim sentiat intimas medullas
 11 caelestis patriae flagrare amore,
 12 et desiderio beatitatis,
 13 quam Christus Deus usque pollicetur
 14 suis, si modo se sequantur unum,
 15 precari similem migrationem
 16 ad caelum sibi ab his tenebricosis
 17 Orci sedibus, in quibus tot inter
 18 curas vivere cogimur, procaces
 19 aeternae comites ducesque mortis.
 20 Dum tu, inquam, numeris Maronianis
 21 tuorum socium canis triumphos,
 22 his nugis ego versibusque ab omni
 23 purgandis macula occupatus insto
 24 noctes jam prope perpetes diesque,
 25 casti ut perveniant et integelli
 26 ad manus hominum severiorum.
 27 Quos si tu quoque censeas legendos,
 28 dignos ipse etiam putabo, tristis
 29 quos legat Cato Persiusque doctus.

AD MARIUM COLUMNAM

C4_3 v.1 O, spes maxima nominis Latini,
 2 Mari, nobiliumque flos Quiritum
 3 atque ingens decus additure genti,
 4 unde es editus, et future tandem
 5 tuae gloria singularis urbis :
 6 si quam olim puer asperam arduamque
 7 ingressus cupidissime fuisti,
 8 qua possis ope cumque nunc ad unam
 9 virtutem institeris, viam jugumque
 10 perges exsuperare, ubi illa dulces
 11 fructus suggerit omnium laborum,
 12 quos hic pertulimus, sinumque ditem
 13 nobis pandit et expedit fruendum.
 14 O tum te merito Mari beatum.
 15 Nam si nobilitas avita opesque
 16 magnae ac tam bene constitutae, et ipsum
 17 corpus egregiae decore formae,
 18 si virtus animique magnitudo,
 19 quam quidem haud semel horruit superbus
 20 hostis laudeque prosequutus omni est,
 21 cunctis principibus gregariisque
 22 cunctis, hospitibusque civibusque

23 commendat modo te facitque, ut omnes
 24 unum suspiciant amentque : quid tum,
 25 quid tum, inquam, fore credimus, Columna,
 26 cum virtus tua, cum laboriosus
 27 cultus ingenii perelegantis,
 28 cum multi simul uberesque partus
 29 doctrinae interioris et profundae,
 30 quam nunc tu tibi comparare pergis,
 31 augebunt bona tanta ? Nonne tute
 32 jam vides fore, ut omnium colaris
 33 consensu et pietate sic, ut unus
 34 inter nos quasi censearis heros
 35 saeculi illius aurei, Jovique
 36 et Marti simul et Minervae amici.
 37 Perge ergo, o animi Columna macte
 38 virtute : et labor ullus haud retardet
 39 ad tantum decoris, nec ulla frangat
 40 conatum tibi blandiens voluptas.
 41 Nam quae praemia consequere, laudem
 42 tuam in saecula cuncta prorogabunt.
 43 Nec nomen patientur interire,
 44 dum sol adveniens diem reducet
 45 cedetque hinc abiens locum tenebris.

AD ALEXANDRUM IUSTIUM I.C.

C4_4 v.1 Justi, cur ego nunc domum redire
 2 et revisere patrios penates
 3 tam valde cupiam, rogas ; et Urbem
 4 laudas, quae solet affatim beare
 5 cives et simul hospites benigna.
 6 Audi si vacat, et tuum sodalem,
 7 qui te diligit aestimatque tanti,
 8 quanti nec potis aestimare quemquam,
 9 putato tibi vera confiteri.
 10 Si qua me ambitio insolensque fastus
 11 perculsum retineret, aut habendi
 12 plane spes superesset ulla, et ipsum
 13 vitae curriculum latentis umquam
 14 damnavissem : equidem libenter essem hic
 15 in orbis quasi totius theatro,
 16 in quo conspici ab omnibus simulque
 17 omnes conspiciere atque adire possem.
 18 Nunc autem memor illius beatae
 19 vitae, cum tenuis selibra oryzae,
 20 cum farris mihi bis novem duellae,
 21 cum mites oleae recensque bulbus,
 22 molles coliculi, intybi salubres,
 23 cum vini cotyle una lenioris,
 24 aut fonte e gelido latex petitus,
 25 sedabant pariter sitim famemque,
 26 odi delicias, opes, honores,
 27 et fastus tumidos potentiorum.
 28 Meque propterea domum referre
 29 ad cenas tenues dapesque inemptas
 30 quamprimum statui Urbe derelicta,

31 ut vitae reliquum mihi ipse vivam.
 32 At tu, cui patet undique expeditus
 33 ad amplos aditus grados, et ipsa
 34 morum candida comitas gravisque
 35 virtus omnia summa pollicetur,
 36 et vires bona suppetit juventa,
 37 ne desis tibi : perfer, urge et insta
 38 memor, nil sine maximo labore
 39 ab auctore dari omnium bonorum.

DE SAXO CURARUM CARCERE AD HOSPITEM

C4_5 v.1 Hoc viden' rude prominensque saxum
 2 ad laevum latus Elsulae ? Quod astra
 3 nudo vertice suspicit ; quod, aestus
 4 ingens dum furit, ingruique frigus
 5 atque omnes nive conteguntur alpes,
 6 sub dio manet horridum, suaque
 7 sese mole tuetur a calore
 8 atque a frigore, nec fatiscit ullo
 9 victum tempore, nec ruit labatve
 10 nimbis, imbribus, ignibus, procellis,
 11 saevis turbinibus, ferisque et atris
 12 tempestatibus undique appetitum.
 13 Hoc, inquam, rude prominensque saxum,
 14 cum ruris dominus Bivilliani
 15 (hunc dico Meliorum Philippum,
 16 quo nemo melior benigniorque,
 17 nemo affabilior domi forisque
 18 aut est, aut fuit, aut erit, nec ullus,
 19 qui Musis faveat magis libenter
 20 magisque ex animo) negotiosa
 21 ab urbe aufugiens, forensiumque et
 22 rerum paene odio domesticarum,
 23 in sinum quasi convolans quietis
 24 atque otii, propere receptat huc se,
 25 carcerem voluit patere morbis
 26 nos nostrumque animum comesse suetis ;
 27 in quo compedibusque vinculisque
 28 constrictas rigidis haberet omnes
 29 curas pervigiles et inquietas,
 30 ac tandem sibi viveret beatus
 31 et sui frueretur otiosus
 32 ruris deliciis, opacitate
 33 nimirum nemoris comantis, atque
 34 fluxu et murmure fontium perenni,
 35 et rivi scatebris strepentis inter
 36 arbusta, et vario colore florum,
 37 exstructisque toris virentis herbae,
 38 et Limoniadum tacente valle,
 39 ad quae flagitium est tulisse curas
 40 et morbos animi molestiores.
 41 Quare idem dominus suis amicis,
 42 suis hospitibus, quibus paravit
 43 ista non secus ac sibi, et propinquis,
 44 hanc legem tulit omnibus futuram

45 acceptamque ratamque : dum manebit
 46 saxi immobile robur, et nepotes
 47 suos (namque alios nihil moratur)
 48 haeredes eadem sequetur una haec
 49 vitae suavis et integrae voluptas.
 50 Hospes aut abes, aut in hocce curas
 51 omnes carcere mitte compeditas.

AD IO. BAPTISTAM ASINIUM I.C.

C4_6 v.1 Quis me laetior est beatiorque ?
 2 Quando mox Asini alloqui ac videre
 3 decem post hiemes, decemque messes
 4 te summum mihi et optimum et perennem
 5 amicum potero videre et una
 6 audire et simul alloqui, fruique
 7 a sole exoriente ad occidentem
 8 te, quem sic ego diligoque amoque, ut
 9 unusquisque oculos suos amamus ;
 10 a quo sic amor ipse rursus, ut qui
 11 amatur nimis impotenti amore.
 12 O quae gaudia sunt futura ? Et, o quos
 13 amplexus repetemus ? Et vicissim
 14 ipse me, ipsum ego te osculabor atque
 15 in meis oculis tuos ocellos
 16 defiges penitus, nec amovebis
 17 pupulas nimio ebrias amore,
 18 ac desiderio mei fragrantas.
 19 Nec meas ego pupulas meosque
 20 non usque in te oculos tenebo fixos,
 21 testes laetitiae intimique sensus,
 22 qui mihi os lacrimis madere coget ;
 23 ac nostras itidem osculationes
 24 centies iterabit hinc et illinc.
 25 Quin jam nunc videor tuum videre
 26 pallentem nimio timore vultum,
 27 dum pericula tanta, dum labores,
 28 dum casus varios viae marisque
 29 procellas, hominumque barbarorum
 30 dum mores tibi et instituta dicam ;
 31 addam et flumina lata, dum nivalem
 32 Ismarum, Rhodopemque, Peliumque,
 33 Ossanque, atque Atho insulasque in orbem
 34 describam positas, et ipsa Ponti
 35 percurram ostia Thraciamque sedem
 36 regis imperio prementis omnem
 37 Europam atque Asiam modo Africamque.
 38 At vos, tempora quae soletis, Horae,
 39 metiri, ipsaque praeterire cursu
 40 Jovis fulmina et impetum procellae,
 41 et, si mobilius quid esse fertur,
 42 nunc, o, nunc precor, expedite pennas
 43 et me, cui mora tantula haec diei
 44 ingrata accidit omnis et molesta,
 45 jam nunc sistite ad ostium foresque
 46 tam cari capitis, neque haec utrique

47 incesso nimiaque tarditate
48 nostrum mutua dissipate vota.

D OCTAVIANUM NIGR. I.C.

C4_7 v.1 Octavi Niger erudite iudex,
2 iudex integer innocensque vitae,
3 qui summa sapientia fideque,
4 qua polles, hominum molestiores
5 congressus dirimis secasque lites,
6 Bargaeus tibi gratus usque grates
7 agit, non quia veritate causam
8 praescriptoque magis, quam amore et ira
9 (has partes quoniam tuetur omnis,
10 qui vere bonus atque habetur atque est)
11 iudicaveris ipse se secundum,
12 sed quod mehercule diligenter omnem
13 tuum impenderis anxius laborem,
14 ut nosset potior suusne forte
15 adversarius esset, an, quod ille
16 negabat, prior ipse possideret.
17 Litem nec facilem, nec explicatam.
18 Quod multis igitur solutus, in quas
19 tricas inciderat, velut misella
20 avis, retia cui tetendit auceps,
21 tua nunc opera exiit : supremi
22 Jovis numina comprecatur, ut te
23 dignum, tempus in omne qui supersis,
24 servent incolumem diu ac beatum.

AD LAELIUM TORELLIUM

C4_8 v.1 Velim, si tibi forte non molestum est,
2 si magnus patitur vacare paulum
3 nunc te a consiliis suum regendi
4 Cosmus imperium negotiisque,
5 Cosmus gloria Etruriae decusque,
6 et terror Latiae Galliaeque ;
7 velim, inquam, relegas modo id, quod ad te
8 scripsi epistolium appetente Vere ;
9 ac, tecum nisi me putas jocatam,
10 nobis quandoquidem propinquus instat
11 jamdudum decimus November, ex quo
12 Pisas venimus, adde ad illa, amabo,
13 quae tum sunt mihi scripta copiose,
14 vel fuse potius loquaciterque,
15 quod Venatio nostra ita absoluta est,
16 nil ut quicquam aliud requirat a me,
17 quam bonos pedibusque naribusque
18 et saevo validos Laconas ore.
19 Hos, ni suppeditentur ampliores
20 sumptus, haud equidem evocare possim
21 in silvas. Etenim siti fameque
22 enecti misere jacere malunt
23 humi, quam dominum sequi vocantem.

24 Quare o praesidium et decus bonorum,
 25 quem propter sapientiam bonumque
 26 omnes in se animum colunt amantque,
 27 ut, quicquid reperitur integrique
 28 et puri, in te homines reantur esse,
 29 Laeli : fac, precor, ut tuum, quod olim
 30 (oderunt nisi me novem sorores)
 31 aetas audiet ipsa posteriorum,
 32 venantem tibi censeas tuendum
 33 ornandumque simul. Neque hercle par est,
 34 tuam quem semel in fidem recepsis,
 35 non omni auxilio putare dignum.

AD MARIUM COLUMNAM

C4_9 v.1 Quod nunc, ut soleo, Mari, quotannis,
 2 ad vos non venio, sed hac in urbe,
 3 quam vos deseruistis, esse pergo
 4 amicis procul omnibus : profecto
 5 nusquam me remoratur aut puellae,
 6 aut Musarum amor ullus. Hunc et illum
 7 nam dempsit mihi pergravis senectus,
 8 et tristes animi anxiaeque curae,
 9 atque expes labor. At neque hercle rursus
 10 facit, quo minus advolem, quod ipse
 11 rebus distinear negotiosis,
 12 mea aut commoda persequar beatus.
 13 Sed nec me retinet pecuniarum
 14 inanem metus ingruens latronum
 15 vias atque iter undique obsidentum ;
 16 nec cujusquam odium potentis hostis,
 17 a quo tristia damna pertimescam :
 18 sed quod horribilis nimisque saevus
 19 affertur mihi nuntius, redisse
 20 ad vos Caculam et attulisse secum
 21 plenum carminibus suis libellum,
 22 ac nunc omnibus illa lectitantem
 23 quaerere in triviis vocationes.

AD IOSEPHUM BOCCAM

C4_10 v.1 Quod te nobilitas vetusta, quod te
 2 clarorum domi imagines parentum
 3 ad famae decus excitant perenne,
 4 quod tu, quod caput est, ad omne tete
 5 laborum genus apparatus ferendum, ut
 6 virtute omnibus anteire possis :
 7 primum qui meus est amor vetustus,
 8 et constans animi mei voluntas
 9 erga te, tibi plurimum tuaeque
 10 gratulor patriae ; voloque et opto
 11 illud sit tibi ceterisque felix,
 12 faustumque omnibus intimis, propinquis,
 13 cognatisque bonis bonisque amicis ;
 14 dein vero mihi gaudeo, quod ipsi

15 tandem praemia consequentur ampla,
 16 dum te perpoliunt mei labores,
 17 atque unum simul instruunt ad acre
 18 parandae studium decusque laudis.
 19 Nam quae gloria quaeque te sequetur
 20 claritas, eadem sequetur olim
 21 et me gloria claritasque fama.
 22 Quare, quod facis, obstinatus urge,
 23 urge, perfice, cura et elabora,
 24 ne domo mage debeas vetustae,
 25 quae illustrat modo te facitque notum,
 26 quam domus tibi debeat vetusta,
 27 dum se laudibus undique affluentem
 28 augens assidue novo ac perenni
 29 gloriae cumulo, atque litterarum
 30 splendore, ac studio, eruditionis
 31 laudibus facis affluentiore.

AD BERNARDUM VIGNIAM I.C.

C4_11 v.1 Quas puer tuus attulit virentes
 2 et dulces itidem sapore olivas,
 3 valde Vignia, mi fuere gratae.
 4 Idque non ideo, quod in me avarus
 5 et rapax animus sit appetensque
 6 donorum (procul absit hoc), sed hercle
 7 quod sum munere suspicatus isto
 8 memet admonitum, solere mentem,
 9 si cui durior efferatiorque est,
 10 non modo obsequio perennibusque
 11 molliri officiis, sed arte blanda,
 12 et cultu, et studio perinde, ut ipsae
 13 omnem amaritiem exuunt olivae,
 14 non victae sale, non aceto ab acri,
 15 (lentum nam solet id negotium esse)
 16 sed intra spatium unius diei
 17 aqua, quae prius aestuante fluxit
 18 guttatim media eliquata calce.
 19 Nam quid credam aliud per involucra haec
 20 a te praecipue mihi indicatum,
 21 qui subtilior esse acutiorque
 22 soles omnibus explicans docensque
 23 jus civile ? Igitur fuere valde
 24 uno hoc nomine grata, quae dedisti.
 25 Nec minus tamen illa, quod profecta
 26 sunt a te Charitum patre atque alumno,
 27 et mei studioso honoris ; et quem
 28 propter eximias perelegantis
 29 dotes ingenii et parata multo
 30 ornamenta animi labore, semper
 31 amavi unice et unicum putavi,
 32 quem mecum juvenes senesque amarent.
 33 Vale Vignia, et ipse nos amato,
 34 amici ut boni et integri et modesti,
 35 et, qui gratum animum gerunt, amantur.

AD MARIUM COLUMNAM

C4_12 v.1 Quis nam carmina tam polita, quis nam
 2 versus tam lepidos et elegantes
 3 dictavit tibi, mi Columna ? Quis nam
 4 ostendit numeros modosque dulces,
 5 quorum vi fera corda leniendo
 6 esse jam nova crederere Siren ?
 7 Siren, quae mihi ceterisque furtim
 8 sensus afficeret et excitaret
 9 cunctis laetitiisque gaudiisque.
 10 Quis te, inquam, docuit ? Quis erudivit ?
 11 An Phoebus pater ? An novem sorores ?
 12 An certe simul ille et illae, ut omnes
 13 scribenti tibi cederent poetae ?
 14 Sed, cuicui potes hunc referre cultum
 15 acceptum ingenii boni ac subacti,
 16 fac tu versiculos frequenter ad me
 17 mittas, quos animo auribusque in ipsis
 18 defigam penitus, diesque mecum
 19 et noctes repetens legensque, vitam
 20 degam perpetuo beatus omnem.

AD FRANCISCUM VINTHAM I.C.

C4_13 v.1 Quae, testes animi tuique amoris,
 2 a te carmina septimo calendas
 3 Decembres tuus, erudite Vintha,
 4 Paullus filius attulit, fuerunt
 5 tam grata Angelio Ciofioque,
 6 quam gratissima quae vel esse cuiquam,
 7 vel cuiquam a veteri evenire amico
 8 jucundissima sueverint. Quod idem
 9 Paullus scilicet ipse, quo nec umquam
 10 amari a patre dignior fuitve,
 11 aut est, aut erit ullus, asseveret,
 12 Paullus optimus utriusque nostrum
 13 testis laetitiaeque gaudiique :
 14 quo nobis lepidum tuum poema
 15 perfuditque animum intimosque sensus,
 16 quoque perpetuum ac laboriosum
 17 docendi hoc honus allevavit. Ergo
 18 cum tibi datur otium potesque,
 19 si nos diligis ipse, si ipse sentis
 20 ipsum te quoque diligi aut amari
 21 a nobis potius, frequenter istas,
 22 istas Angelio Ciofioque,
 23 laborum, bone Vintha, quos uterque
 24 perfert assiduos (ego in corona
 25 illustri juvenum virumque coetu
 26 explanans veteres bonos Poetas,
 27 bonos Historicosque rhetoresque,
 28 atque ille in celebri schola audientum
 29 consessuque hominum gravi et frequenti
 30 jus civile docens) frequenter, inquam,

31 tuis Angelio Ciofioque
 32 mitte hujuscemodi molestiarum
 33 istas quaesumus allevationes.

AD LAELIUM TORELLIUM

C4_14 v.1 At Musae tua ob hoc Torelle factum
 2 facta conticeant tuasque laudes,
 3 quae passim volitant virum per ora,
 4 omnes praetereant decusque, quando
 5 nil est, quod queat invenire quisquam,
 6 cujus nomine jure te reprendat,
 7 vel tibi male quid precetur : unum
 8 praeter hoc, Meliorius quod ipse,
 9 ipse, inquam, Meliorius perenne
 10 decus, praesidium artium bonarum,
 11 nos te non prohibente nunc relinquit,
 12 et istuc redit obstinatus. Ac tu,
 13 tu, quem consulere omnibus decebat
 14 nobis, quot sumus, hunc vides redire,
 15 vides, et patere, et nihil moveris.
 16 O pectus scopulisque cautibusque
 17 multo durius et rigente ferro.
 18 Hoc est, quod juvenes boni senesque,
 19 sic me ament Superi, ferunt moleste ;
 20 nec est quod videant minus libenter,
 21 Pisis qui assidue negotiantur,
 22 ab illo fieri. Dolet misella,
 23 quod his, quem sibi civitas patronum et
 24 civem asciverat, hac profectione
 25 maesta atque omnia muta derelinquit.
 26 Idque mehercle jure : namque cuncti
 27 hunc, qui proximus est peractus, annum
 28 viximus bene ac nimis beate.
 29 Quare, si cupis ipse inire magnam
 30 Laeli gratiam ab omnibus : precare,
 31 urge, quod potes, ut recurrat ad nos
 32 quamprimum, omnibus omnium expetitus
 33 votis ; quod facere ipse si negabit,
 34 et saevus volet hinc abesse, ruris
 35 tandem ut deliciis suis fruatur,
 36 et felix sibi vivat et beatus,
 37 tum tu, quo luat obstinationis
 38 poenas, des operam, ut jugum, quod ille
 39 villa suspicit e sua, quod alta
 40 horret abiete prominens et umbras
 41 frigentes jacit aestuante caelo,
 42 denudet ferus improba securi
 43 et vastet nemus omne Servianus.

AD IO. BAPTISTAM MINUTULUM

C4_15 v.1 Quod libros mihi, quos habere avebam,
 2 huc Minutule miseris ab usque
 3 urbe ista celeberrima et beata,

4 quam suis, ubi confluunt in unum
 5 Ararque et Rhodanus rapax, fluentis
 6 alluunt, ago gratias libensque
 7 illud polliceor professus unum,
 8 me daturum operam, ut tui labores,
 9 tua haec munera liberalitasque
 10 haud prorsus male judicentur a te
 11 esse in me posita. Id quod assequemur
 12 si non te pariter remunerando,
 13 at certe tibi gratiam hanc habendo
 14 magnam et perpetuam. Neque hercle quicquam est,
 15 quod a me magis expetas vel optes.
 16 Nam tu quod bene promereris et quod
 17 benigne facis, illud et perennis
 18 et jugis potius bonos in omnes
 19 tui signum animi est et instituti,
 20 quam obscuri indicium malique quaestus.
 21 Sed si mi tamen offeratur umquam
 22 ulla occasio, si qua sit facultas,
 23 ut possim tibi gratiam referre,
 24 ingrattissimus arguar, nisi omni
 25 conatu efficiam, ut videre possis
 26 id me non magis ore praedicare,
 27 quod olim tibi debeam, libentem,
 28 quam quod jam semel ipse dedicarim,
 29 et prae me tulerim novae et perenni
 30 debere alterius benignitati,
 31 re persolvere debitum fatentem.

AD FRANCISCUM VINTHAM

C4_16 v.1 Vintha, quem dubium est diserta plusne
 2 Musa diligat, an Minerva juris
 3 custos atque amet haec, ut illa : namque
 4 nec sollertior esse acutiorque
 5 quisquam te potis, aequiorve legum,
 6 quas et Romulus optimusque Cosmus
 7 tulerunt Latioque Etruriaequae,
 8 dum patefacis abditos recessus
 9 nodosque haud faciles resolvis, in quos
 10 severus solet incidisse iudex.
 11 Nec rursus facit eruditus ullus,
 12 ullus Aonidumque Apollinisque
 13 alumnus vetus, et perennis undae
 14 cultor Pieriae undique expolitus
 15 magis carmen amabile et venustum,
 16 nos una unanimes tui sodales,
 17 Bargaeus fidibus sciens Latinis,
 18 si non mirifice, ac perinde ut ille,
 19 qui multum coluit diuque Musas,
 20 et Graias simul et simul Latinas,
 21 ac Ciofius utriusque juris
 22 interpres bonus omniumque cultor
 23 doctrinae optimus elegantioris,
 24 plurimum tibi gratulamur ambo,
 25 quod aevo bene consulens futuro

26 et praesenti etiam, tuos labores
 27 in lucem edideris ; neque inde uterque
 28 grates non agimus, quod in libellis
 29 tuis fecerit ipse mentionem
 30 nostri honorificam illiusque testem,
 31 quo nos afficis, indicemque amoris.
 32 Quod si quid quoque praeter actionem
 33 possumus, bone Vintha, gratiarum
 34 praestare, aut opera, aut benigniore
 35 voluntate animi, illud et futurum
 36 apud nos tibi, et esse sic paratum
 37 scito, ut nil habeas, quod hic vel istic
 38 sit paratius expeditiusque.

AD LODOVICUM BECCATELLUM ARCHIEPISCOPUM EPIDAURENSEM

C4_17 v.1 O flos, o decus, o Bononiensis
 2 urbis unice Lodovice ocella,
 3 quamquam sum nihil ipse adhuc mearum
 4 nugarum tibi mittere ausus umquam,
 5 quae palam facerent meum in te amorem,
 6 vel, quod verius efficaciusque est,
 7 voluntatem animi usque prosequentis
 8 omni te pietate et omni honore,
 9 observantia et omni, ut alta virtus
 10 expetit tua candidique mores ;
 11 illud assidue tamen cupivi,
 12 non, inquam, mihi demererer ut te
 13 levi munere quopiam gravive
 14 (nam quid possum ego tale polliceri),
 15 verum ut insererem tuum his libellis
 16 nomen et fieret mihi in futurum
 17 haec accessio gloriae suprema.
 18 Quod si sum minus antea assecutus,
 19 pudori tribues modestiaeque
 20 meae ; funditus interisse quam nunc
 21 ut vides, ita censeas licebit
 22 hujus gloriolae assequendae et hujus
 23 in te testificandi amoris unum,
 24 et cultus et honoris haud fuisse
 25 me desiderio parem ferendo.

AD RANERIUM BOCCAM

C4_18 v.1 Raneri juvenum senumque ocella,
 2 Pisarum decus unicum tuarum :
 3 qui, duros veritus nihil labores,
 4 pergis, quo semel ire constitutum est ;
 5 nec cursum piger ad bonas Camenas
 6 et artes Ciceronis ad disertas
 7 usquam deseris, interimque regi,
 8 quam debes, operam tuo fidemque
 9 noctes assiduus diesque praestas.
 10 Ut nec te studiosior sit alter
 11 atque amantior artium bonarum,

12 nec quisquam tamen excubans peraeque
 13 ad nutus vigil usque et usque magni
 14 Cosmi Etruriae optimi parentis
 15 et summi Ducis adstet haereatque,
 16 observans cupide quid imperetur,
 17 quidve agi deceat. Puer beate,
 18 beate o juvenis beatiorque
 19 tuo isto ingenio future : cuncta
 20 caelestum tibi vota rex secundet.

AD FRANCISCUM SANNIUM VENETUM

C4_19 v.1 Quod cynegeticos meos libellos
 2 laudas magnopere et perelegantes
 3 videri facis elegante versu,
 4 quodque suavidicis eos putasti
 5 ornandos numeris tuis, quod e me
 6 hac re significasti amare multum,
 7 plurimum tibi debeam necesse est.
 8 Sed, quales tamen esse cumque censes,
 9 gratias ago maximas, diserte
 10 mi Sanni, tibi debeoque, quantum
 11 alteri pote debuisse quisquam est,
 12 tuum ob iudicium tuumque amorem.
 13 Quorum ego alterutro (neque hoc pudebit
 14 fateri ingenueque libereque)
 15 delecter magis, explicare verbis
 16 non ausit mea Musa ; nec profecto
 17 puto id, si audeat, esse praestituram.
 18 Verum, ut iudicium tuum peracre
 19 hic forsitan videatur esse nullum,
 20 illud polliceor tamen, daturum
 21 enixe me operam, tuo ipse amore ut
 22 indignus videar fuisse nulli.

AD MARIUM COLUMNAM DE PORRO CANE

C4_21 v.1 Quem dono catulum mihi dedisti
 2 ablatum uberibus suae parentis,
 3 Columna o decus omnium Quiritum,
 4 Martis unica spes Apollinisque,
 5 scis me (quod puto) nominasse Porrum :
 6 idem, ac si Cicero Latiniore
 7 verbo aut Varro Terentius vocasset
 8 Verrucam. Atque ego non negem futurum id
 9 fuisse aptius elegantiusque.
 10 Verum haec me duo terruere, quae sunt
 11 et magnae et gravis aestimationis.
 12 Unum (quod merito fuit timendum)
 13 is ne intelligeret parum Latine,
 14 qui Roma procul urbe natus esset.
 15 Alterum (quod et ipse non negabis,
 16 quando est ponderis haud minoris atque
 17 minori haud vigilantia cavendam)
 18 ne, si perciperet vocabulumque hoc

19 et verbum vetus, efficaxque et altum
 20 lectumque e Latio, nimis superbe
 21 sese mox gereret domi forisque :
 22 ceu si progenies foret Sabinae,
 23 aut Marsae canis Apulaeve, siquam
 24 ipse in deliciis habere suesset
 25 Maximus Fabius tuus tribulis,
 26 qui passus facile et libenter olim est
 27 Verrucosus ab omnibus vocari.
 28 Utrumvis igitur, Mari, accidisset,
 29 nimirum pariter vel hoc vel illud,
 30 tuissem aegro animo et nimis molesto.
 31 Ergo mi libuit vocare Porrum.
 32 Ac ne forte alicui probo et pudenti
 33 (quod vulgo fieri solet) viderer
 34 mendax et nimium fuisse ineptus,
 35 nunc illi geminae labris in ipsis
 36 verrucae intumuere derepente,
 37 quae videlicet indicant aperte,
 38 et palam memorantque praedicantque,
 39 cum magno meo honore gloriaque
 40 cum vera propriaque, deligendis
 41 me in praenominibus videre multum.

AD IOSEPHUM BOCCAM

C4_22 v.1 En jam, quos ferus excitarat aestus
 2 ingentes Leo Siriumque sidus,
 3 noctis longior hora proximusque
 4 October relevare, Bocca, coepit.
 5 Et nos ad studia eruditionis
 6 jamdudum Aonides vocant sorores.
 7 Valetate o igitur leves volucres,
 8 valetate incolumes ferae, valetate
 9 pisces Aesaris usque dum redibit
 10 Bocca istuc, decus omnium suorum
 11 et solus juvenum bonorum ocellus
 12 Musarumque amor omnium ; valetate,
 13 inquam, et vos bona sospitet Diana,
 14 saevoque abstineat manus ab arcu :
 15 ut, cum rus iterum reviset ille,
 16 intactas agat integrasque praedas
 17 ferarumque aviumque pisciumque,
 18 ac se recreet ab labore et aestu,
 19 aestu et assiduo labore, qui nunc
 20 a nobis repetendus, omnibusque
 21 cum Musis ratio est habenda. Quando
 22 frigus id monet atque hiems propinqua,
 23 id mens deliciis refecta ruris
 24 jam jam mirifice expetitque avetque.
 25 Valetate ergo iterum leves volucres,
 26 et feri lepores vagique pisces :
 27 vobis nam satis est datum superque.
 28 Nunc id, quod reliquum, pereruditatis
 29 dandam est temporis aureisque libris.

AD FRANCISCUM VINTHAM

C4_23 v.1 Commendo tibi, mi diserte Vintha,
 2 in de quo semel ipse bisve tecum
 3 Pisis, Vere ne adulto (an appetente ?
 4 an jam praecipitante ?) sum locutus.
 5 Hujus assidue acriterque vexat
 6 me molestia cogitatioque
 7 ducendi suum ad exitum negotii :
 8 vexat hercule sic, ut inde vitam
 9 degam sollicite et laboriose,
 10 complectens animo, velutque ab alta
 11 prospectans specula, volubilisque
 12 et vagae subitos malosque casus
 13 Fortunae, metuensque posterorum
 14 lites, insidias, calumniasque.
 15 Quare non modo postulo hoc, sed oro, ut,
 16 cum primum poteris dabitque sese
 17 tibi occasio, Vintha, colloquendi,
 18 qui cum propterea loqui necesse est,
 19 reddas (quae tua gratia est) id omne
 20 confectum mihi, quicquid est negotii.
 21 Sic, qui jam omnibus antecellit unus,
 22 quotquot se studio dedere legum,
 23 filius tuus optimus tuique
 24 corporisque animique vera imago
 25 Bellisarius afferat periti ad
 26 ornamenta patris decusque avitae
 27 ingens, egregium et perenne gentis
 28 virtutum cumulum ipse grandiosem.